



Al. Ayell.
17.3. '34

242 MOT

MOORE COLLEGE
LIBRARY

MOORE THEOLOGICAL COLLEGE LIBRARY




3 2042 10017207 5



“ILO RORONŌA.”

British Solomon Islands :

Printed at the Melanesian Mission Press, Maravovo, Guadalcanar,
1933, [M.]



□ □

*A Booklet of Private Devotions,
in the language of MOTA,
compiled especially for "The Brothers."*

□ □

APE BOOK ILOKE.

Me vile tuwale o nonomia nan iloke, wa me qisan, o manigiu Ra Retatasiu me paere apena. We nonom si o book iloke te pirin ira Retatasiu raka sage, pa nau we nonom mulan si we qogo wun te ilo suar lai o pirinira alolona si we tataga o nonomia tapena.

Nok o maros si iragai we taur o book iloke a nom qalo lai ape sike Nalanan God alo we toga rorono galtag valqon. "Nina tataga taso si nina gilala lai i Lord."—Hosea 6. 3.

G. T. W.

O RAVERAVE GAGANAG.

Te tataga tamaike—

Alo Matava—Val Week.

Sunday—I Lord avune Wolowolo, 1-4

Monday— " " 1

Tuesday— " " 2

Wednesday— " " 3

Thursday— " " 4

Friday— " " 1-5

Saturday—I Lord alo Matev Tanun.

Alo Ravrav—Week 1.

Sunday—Ira Gene Vawia, 1

Monday— " 2

Tuesday— " 3

Wednesday— " 4

Thursday— " 5

Friday— " 6

Saturday—

Alo Ravrav—Week 2.

<i>Sunday</i> —	Ira Gene Vawia,	7
<i>Monday</i> —	„	8
<i>Tuesday</i> —	O Vavae amon Jesus, “Inau,”	1
<i>Wednesday</i> —	„	2
<i>Thursday</i> —	„	3
<i>Friday</i> —	„	4
<i>Saturday</i> —	

Alo Ravrav—Week 3.

<i>Sunday</i> —	O Vavae amon Jesus, “Inau,”	5
<i>Monday</i> —	„	6
<i>Tuesday</i> —	„	7
<i>Wednesday</i> —	O Vavae nan o Wolowolo,	1
<i>Thursday</i> —	„	2
<i>Friday</i> —	„	3
<i>Saturday</i> —	

Alo Ravrav—Week 4.

<i>Sunday</i> —	O Vavae nan o Wolowolo,	4
<i>Monday</i> —	„	5
<i>Tuesday</i> —	„	6
<i>Wednesday</i> —	„	7
<i>Thursday</i> —	O Sogov Vui,	1
<i>Friday</i> —	„	2
<i>Saturday</i> —	

Alo Ravrav—Week 5.

<i>Sunday</i> —O Sogov Vui, 3	
<i>Monday</i> —	„ 4
<i>Tuesday</i> —	„ 5
<i>Wednesday</i> —	„ 6
<i>Thursday</i> —	„ 7
<i>Friday</i> —O Woai talo Vui, 1	
<i>Saturday</i> —

Alo Ravrav—Week 6.

<i>Sunday</i> —O Woai talo Vui, 2	
<i>Monday</i> —	„ 3
<i>Tuesday</i> —	„ 4
<i>Wednesday</i> —	„ 5
<i>Thursday</i> —	„ 6
<i>Friday</i> —	„ 7
<i>Saturday</i> —

Alo Ravrav—Week 7.

<i>Sunday</i> —O Woai talo Vui, 8	
<i>Monday</i> —	„ 9
<i>Tuesday</i> —“ Anima Christi,” 1	
<i>Wednesday</i> —	„ 2
<i>Thursday</i> —	„ 3
<i>Friday</i> —	„ 4
<i>Saturday</i> —

Alo Ravrav—Week 8.

<i>Sunday</i> —“ Anima Christi,”	5
<i>Monday</i> —	„ 6
<i>Tuesday</i> —	„ 7
<i>Wednesday</i> —	„ 8
<i>Thursday</i> —	„ 9
<i>Friday</i> —I Lord alo Matev Tanun.	
<i>Saturday</i> —

APE WE KALO PATA ILO RORONOA.

Ni te vatnorag inau alo ima sausau anona.—*Psalm 27. 5.*

Ko te vatnorag neira alo tano vatnorag ape Nagoma nan
ragai we vonora.—*Psalm 31. 20.*

We nun, naatak we nereï rorono mun God Magasena.

—*Psalm 62. 1.*

Ka mapsag moma alo i Lord wa Ka nereï malumlumua.

—*Psalm 37. 7.*

Muniko Lord, o roronoa o varean a Sion.—*Psalm 65. 1.*

Ape alo o roronoa we tamata we gara goro nol. . . .

Nom o Vavae Turmana me rowo mavunana.

—*Wisdom 18. 14.*

ALO WE NONOM
APEN I LORD AVUNE WOLOWOLO.

**1. Naqatuna we Rono—we vilvilqat mun
o wolakaukau o manigiu nina, Ni
we tape nina.**

(a) Non o nonomia apen God wa o tapeva sur nina.
Non o vavae we sogov—Nanusuna we wenewene.

(b) Wa saratuwale vag ilone ka nonom—
Ape nonina o nonomia we tatas—o nonomia we lera
apen God, o matawolowolo, o nustup, o lologona.
Nonina o VAVAE we tatas—galegale, pulua, maremare.
Nonina o VALUAVA—me loloqon God, gate tatara, gate
vava masur isei alo we tira.

**2. Napanena we Rono—me woso lue ape
we tape nina.**

(a) Ni me mawmawui nia alo iman i Carpenter.
Ni me vawia ra gopae, ra reremera nia.

(b) Wa saratuwale vag ilone ka nonom ape—
Nina we ge ava mun o panei—we gagapalag gap, we
tanotano tarave, we vus gap isei, o mala gagapalag
we qogo.

3. **Naranona we Rono—we woso goro o manigiu inina.**

- (a) Ni we mule kelkel nia we gagapalag we wia.
Ni we mule Jerusalem nia si a mate.
- (b) Wa saratuwale vag—
Nina we lera nan o matesale nun, taniniga.
Nina we gaplot ape van ave a nina we maros.
Nina we malapusa ape mule ave a God we maros.

4. **Nalolona we Rono—we masmasawora o manigiu inina.**

- (a) Ni we tape God—Ravevena.
Ni we tape o tanun *nan*—o tanun we ge tatas munia—
wa inau.
Alo nina qale ganganor Christ me mate ape nina.
Ni we tape ira anana gai nina o ulusni.
Ni me tape inau wa me ukeg kelua ape nan.
- (b) Saratuwale vag—
Nina gate tape God.
Nina gate tape ra valunina—ragai we tape nina.
Nina gate tape ragai we ge tatas munina.

5. (a) **Nina nomkel si napuganina me woso mare-mare i Lord alo Wolowolo, wa gate pugara sul vires we tira aia alo qon ilone.**

Munau ran Ni me vivtig : o tapeva we poa,
Non God me *nanalue* munau i ganganor.
Nalinak vaketeag me takoa pe tangae.
We nun, inau me woso val *nail* me asiko.

(b) **Nina gaganag lue nonina o lolowono :—**

Lord Jesus Christ me wosoteterpaniko ape nau.
Napugak me wosoteterpaniko.

Na we lolowono ape na me ge tatas muniko.

Ka ge si na uravag o lolowono ape na me ge tatas muniko.

Wa Ka vasoal ma munau Nom o Sogov si na gaganag lue lai nok o lolowono nun wa ge ilo maremare si na nipea ge ava mulan.

(c) Nina gaganag lue nonina o tapeva :—

Vaesuk, meretape, Ko me tape inau wa Ko me ukeg keluko ape nan, Ko me mate si na te esu lai.

Na we tape Ko. Na we lolowono ape na gate tape Iniko tama we tira—Ka ge inau si na tape Iniko we poa nan amoa.

(d) Nina paere amen i Lord si Ni ge nina a tape Ineia we poa nan amoa :—

(e) Nina gaganag lue nonina o momogo goro i Lord :—

Lord Jesus Christ, Natun God, i Natun Mary, kamam we momogoko wa we wiewavae Ko ape mun Nom o Wolowolo wa Nanarama turwia, Ko me tunkel o marama. Ka vasoal ma Nom o Sogov si kamam a gaganag lue Nalenasima mun nanusumam wa mun nomam o togara. Kamam a maros mata-pumam o mawmawui muniko. Kamam a mule rono, mule taniniga alo Nagoma valqonimam.

Christ! Iniko : i Maranaga we ronoga.

Iniko, Natun Mama : toga galava ran ma.

APEN IRA GENE VAWIA.

1. Ira gene vawia we masara alo lolora.

Jesus me wota masmaswora alo ima cow—Natanoepana o tano-gana-cow—Ni me la Non o poava alo togara masmaswora—o qatluna tagai Ni te ilina Naqatuna aia. Ni me mate, o masara, avune Wolowolo.

O gene nol amen Jesus—Navakasalana, ra sogona, Non o Mana nol, o line momogo nora Angel, o tano-riga-goro o marama nan—Ni gate nonom apena tama si Napulana, pa tama si non Tamana—wa Jesus me gagapalag nia, si me map vitag nania tama we tira ape pirin o marana non God ni mule ma, wa Nasasan God ni rono.

.

Jesus, naesuk napulama, o manigiu Ko me la ma ti munau ; o manigiu o ine Ka vatogo inau si na sike tataga Nom o maros. Gate nok o maros, pa Nom o maros ni lai, Lord inau. Ka ge inau si na nonom ape val gene si tagai o sava napulak, wa Ka ge nau si na ge tama we ilogoro gese, gate tama inau i tur tag savasava ran. Ka pirin inau si na gagapalag alo val gene tama si napulama, wa napulak tagai. Ka ge apena tama Ko we maros ran. . . . Ko me wota masmasawora alo ima cow. . . . Ko me mate masmasawora avune Wolowolo.

Wievavae, vareaniko Lord Jesus Christ, ape sogov nol Ko me taur munau, ape Nom o ronovivtig ape nau.

E ! Tunkel we Rono, Pulsala, Tasiu, Ka pirin inau na gilala Iniko nan amoa, na tape sal Iniko nan amoa, na tataga mantag Iniko nan amoa.

2. Ineira ira gene vawia we lolowono.

Ragai we qoqo we mamakei lava ape Neia ; me sanrag Nagona sal nanagonsei o tanun, wa Natarapena sal natarapensei amaira nat tanun—Ineia o mamagarosa wa o lolowono.

Jesus me mule ma ilo gene napulana, wa o tanun *nan* gate lav vasgotia—Ni me tantan ape pulsallana, we lolowono alo qaranin Lazarus ; Ni me tantan goro Jerusalem ; neira me manirinia, me toavtagia, me tala Ineia, pa alo masaoi Ni we lolowono we poa Ni me vava masur iraro vavine *nan* we tantan ape Neia.

.

Jesus, Ka vatogo inau mun o lolowono we rono si na toavtag napugak *nan*, Ka pirin inau na nipea tape o gene *nan* talo marama iloke, Ka ge natoqak ni poavag o magarosa apenra tagvanuak alo nor o togara we gona, wa alo nor o lolowono .
. . I Lolowono wa I Mamagarosa.

Wievavae, vareaniko Lord Jesus Christ, ape sogov nol Ko me taur munan, ape Nom o ronovivtig ape nau.

E ! Tunkel we Rono, Pulsala, Tasiu, Ka pirin inau na gilala Iniko nan amoa, na tape sal Iniko nan amoa, na tataga mantag Iniko nan amoa.

—

3. Ira gene vawia we aperig.

Jesus we manas goro ravevena wa S. Joseph. Ni me vet mun nina si a toga pepewu. Ineia mona me map o makaliu apena, me vasug naranora Sala. Ni me toga matapuna ma ti alo matev God, wa gate nonom si te wosag lai tea si a toga sasarita amen God ; nava Ni me ge wawae kelua, wa me taur mona o matev rowrowovag, wa me qeteg toga alo makalive tanun *nan*, wa me iloa, Natarape Vareana tama o tanun, wa Ni me ge pepewu kelua, we manas goro gai matea, o matea avawo Wolowolo.

.

Jesus, Ka vatogo inau si na nomvasigtag o tanoi tea, wa o wiewavae nora tanun *nan*. Ka ul inau nan o nonomia *nan* talo marama, si na toga wasawasa ape gene *nan* Ko we maros, si na wia alo Nagoma.

Ka pirin inau na mapvitag o nonomia ape nau kel, wa Ka rotig goro nau mun o pepewu, si na toga tataga Namakalima, wa si alo gene *nan* we poa si we mantagai, na togatoga o row-rowovag anama we matakalava—Lord, Tagik, Ko me vasug naranora Sala.

Wiewavae, vareaniko Lord Jesus Christ, ape sogov nol Ko me taur munau, ape Nom o ronovivtig ape nau.

E! Tunkel we Rono, Pulsala, Tasiu, Ka pirin inau na gilala Iniko nan amoa, na tape sal Iniko nan amoa, na tataga mantag Iniko nan amoa.

4. Ineira ira gene vawia we malinsala wa we marou o taniniga.

Jesus, alo me meregale Ineia, me gargara mamasa alo vanua vanameag : Ni me log ira ganganor si a nomleas : Ni me manasag o line taniniga we garaqa : Ni me vatira o marana non God : Ni me tataro mun o ronovivtig apena a Gethsemane si Ni tataga lai o maros non Tamana.

Nonina a tataga Namakalin Christ si inina te tama Ineia. Si tama Ni me mate wa me tavaraka kel ape nina, nina me lav veta o Vasugrono, te matevtag o ganganor wa te esu kel alo line taniniga, we era goro o tortoron kiskislag nol, we goara taso alo togara we wia wa we taniniga.

.

Jesus, Ka vatogo inau ape line momogo we rono, wa Ka pirin inau na vagalo vagoar alalane vaglala anoma goro o ganganor, o marama wa i Satan : Ka pirin inau si na savrag reag o tano tutuag nol wa o qeteg ganganor *nan* : si na tete pul-pulvag o gene we pulua si gate sar. Ka pirin inau si na mamata goro, si na tataro nan wa mule pata ilo galeva *nan*, si

Ka vapoa nok o nomleas wa si a wurvag nok o togara. Nan o ganganor nol, nan o galeva non Satan wa nan o matea galava ;

Mun Nom o gargara mamasa wa o meregaleva,

Mun Nom o Ronovivtig wa o lalais narama ;

Lord Turwia, vaesu inau.

Si kamam a poa alo sogov si kamam a la lue o wo-gagapalag talo Vui ;

Si Ka vasogo kamam amaira anama alo lenas ti galava ;

Lord Turwia, inau we tiasiko, ronotag inau.

Wievavae, vareaniko Lord Jesus Christ, ape sogov nol Ko me taur munau, ape Nom o ronovivtig ape nau.

E ! Tunkel we Rono, Pulsala, Tasiu, Ka pirin inau na gilala Iniko nan amoa, na tape sal Iniko nan amoa, na tataga mantag Iniko nan amoa.

5. ira gene vawia ira lolomamagarosa.

God me tape tamaine o marama, wa Ni me ukeg Natuna o wotuwale, si isei qe nomtupua tete mate, pa te taur mona o esu galava apena. . . . Jesus me mule kelkel me gagapalag o wia, Ni me vaesu ra gopae, Ni me nomvitag napugara ganganor, Ni me vanan ra malinsala, Ni me vava masur iragai we sur siwo, Ni me tataro apen ragai me wosoteterpania alo neira me wosowoso Ineia avune Wolowolo. Ni we esu galava nane si a tataro tinanai mona ape nina mun Non o Wolowolo wa Nanarana turwia Ni me tunkel nina nia.

Jesus, Ka vatogo inau si na nonom ape tanun nol si ratasik nan, si na gaplot ape nomvitag o sava neira te ge ava munau, si na taurmate vagae ape togara we gona si ta pirin lai isei tea nia, si na la o tinegaro alo we nom vasarig ape gene we wia, si na tete lologagara gaplot, si na tete sotsotal wa tete sike vagagogo napulak : pa si na tataga namakalima, Ko me tunkel kamam mun Nom o Wolowolo wa Nanarama turwia—

E ! Vaesu marama !

Wievavae, vareaniko Lord Jesus Christ, ape sogov nol Ko me taur munau, ape Nom o ronovivtig ape nau.

E! Tunkel we Rono, Pulsala, Tasiu, Ka pirin inau na gilala Iniko nan amoa, na tape sal Iniko nan amoa, na tataga mantag Iniko nan amoa.

6. Ineira ira gene vawia ira lolomatartoga.

Jesus, magesena tamaira tanun *nan* me tape God mun o tapeva we taurmate ran, wa mun Naatana nol, wa mun Non o nonomia nol. Ni me ukeg qet o line malakalaka nora tanun *nan* si Ni toga wasawasa ape gagapalag non Tamana. Ineia magesena o ganganor tagai, Ineia me manas goro mun o nonomia tuwale, we rono—alo Ineia o tapeva we taurmate ran. Ineia—magasena—we eleele aneane alo lenasin God o Mama.

.

Jesus, Ka vatogo inau si a rowrowovag muniko i Tagik tuwale wora, si na matartoga tama Iniko we matartoga, si na tama Iniko ran—Ka pirin inau si naturiak wa nok o nonomia nol a tano-riga-goro anoma, si na tape mantag iragai we tira munau na tape ineira, si na toga alo qonik nol we nonom ape Iniko magesema, si na tuwale amaiko tama Iniko Tamama i Tuwale.

Ape Iniko we Rono, Iniko Tuwale, Christ, we eleele alo lenasin God o Mama.

Wievavae, vareaniko Lord Jesus Christ, ape sogov nol Ko me taur munau, ape Nom o ronovivtig ape nau.

E! Tunkel we Rono, Pulsala, Tasiu, Ka pirin inau na gilala Iniko nan amoa, na tape sal Iniko nan amoa, na tataga mantag Iniko nan amoa.

7. Ira gene vawia we ge tamata kel.

Log ronoga God vawo tuka, wa ni tamata a marama. Jesus me le munina Non o tamata, wa Ineia mona nonina o tamata. Me as raveagluea ape puganina, me ge manamnamua ape nonina o ganganor ; me le ivunana o pug nina qara tamata apena : wa me mawo munina mun o towtowosia.

.

Jesus, Ka vatogo inau na tape poa o tanun nan, si nau tete sotal kel nan pa mun o nomtagtageag kel nau na gagapalag tama we tira munau : si na ora goro nagarameak, wa namatevuk : si na ronomalumuaga, lolomalumlum : si na sike o tamata wa a pirin apena, si na pirin a ge pea o varkesa wa o vagalo.

Jesus, Ka ave naranomam ilo matesale tamata.

Iniko, Ko we ge tagea o mana non Satan,
Ka lareag napugamam.

Ka ge wora natoqamam we wasvat,
Ka ge pultuwale kel kamam wa o Mama :
Vasoal Nom o Tamata ma mun kamam.

E ! Lamb non God, i Lareag napugan marama, vasoal Nom o tamata ma mun kamam.

Wievavae, vareaniko Lord Jesus Christ, ape sogov nol Ko me taur munau, ape Nom o ronovivtig ape nau.

E ! Tunkel we Rono, Pulsala, Tasiu, Ka pirin inau na gilala Iniko nan amoa, na tape sal Iniko nan amoa, na tataga mantag Iniko nan amoa.

8. Ineira ira gene vawia we gege ineira o manigiu o taniniga.

Jesus me toa i Misraim nan o lologagara non Herod : me vure Ineia nan o Ima-siwo tnwale a Nazareth : me tila Ineia si me pulpul amen Satan : me sorav gorca vagaqogo we gosgosorag Ineia : me veveg variava Ineia : me towosia me

porporosag Ineia : me ananus ivunana : me wosowoso Ineia :
me vilqatia mun o wolakaukau : me wosoteterpania.

Nanalue 19. 11-16.

NAN nau me ilo o tuka me waka, wa ilo, o horse we
aqaga, wa i gene we pute avunana, we logia si we
kokomag wa we nun, wa ni we veveg wa we vagalo alo
line taniniga. Pa namatana o garama av, wa avune
qatuna o gaviilvilqat we qogo ; wa me rave munia o sasai
isei gate gilala ran pa ineia magesena. Wa ni me saru o
siopa me tuk ti alo nara ; wa we log nasasana si, I Vavae
non God. Wa o vavtig vagalo *nan* tavune tuka we tataga
neia vawo horse *nan* we aqaga, we saru o siopa we aqaga
wa we wenewene. Wa nan navalana ti roworowolue o
gasal we tup, sin visarag o sul *nan* nia ; wa ni te altag
gorora mun o kere talai ; wa ni we varavara mona o tano
wine tape lologagara we saqo non God, i riga goro ron-
ronotar. Wa nasasana amaia me rave goro non o siopa
wa navinana si, MARANAGA NORA MARANAGA, WA LORD GORO
LORD NAN.

Jesus, Ka pirin inau na la o vavakae ape gaganag we tira
apeniko : si na manasag Nom o Vavae, si o masaoi ta apena si ta
tagai : si a norov goro, si a gol vatanau, si a toretore mun o
ronomalumuaga wa o nonomia we wia, si a matag goro alo
gene nol : si a ronovirig alo togara lopsag : si a ge taurmate
nok o line rowrowovag :—

si a taurmate ape ukeg kel nau ;
si a vagalo o matai vagalo ;
si a ge paso nok o gagapalag ;
si a kokor goro o nomtup.

Ko we kokomag, Ko we nun.
Inau we tataga Iniko,
Maranaga inau, Lord inau.

Wievavae, vareaniko Lord Jesus Christ, ape sogov nol Ko
me taur munau, ape Nom o ronovivtig ape nau.

E ! Tunkel we Rono, Pulsala, Tasiu, Ka pirin inau na gilala Iniko nan amoa, na tape sal Iniko nan amoa, na tataga mantag Iniko nan amoa.

¶ *Te tataro tuan lai iloke ape kule tavalin tea.*

Tunkel we tur rono, Pulsalak, Tasik, Lord Jesus. Na te tataga arivtag Iniko, na te tape sal Iniko. Panava, na me gogolo, wa na me tataro si na tataga mantag ran Iniko. Ape—

Ko me tur masmasawora ran ;

Me nom vasigtag, me nustupuko ;

Ko me malisala ran, Ko me malaso ran ;

Naimama tagai.

Ko me mate mun o Ronovivtig we poa alo panera tavalalea.

Nalolok suriko, o manigiu o ine si Ko we maros inau, na te tataga Iniko—alo togara masara, magasei, lolowono, ronovivtig, vasigtag, koskos, wa alo matea ran. Ka tuan munau si na vavaka ape taur kalo nok o wolowolo, wa a tataga Iniko.

Lord, na gate sar si na tataga namalekama, na te un mata-puk tape Nom o lasa tamavea ? Pa Ka manag inau na qara ge lai Nom o maros, wa mun o tapeva te tataga peteniko.

Lord Jesus . . . Pulsalak wa Tasik.

O VAVAE AMON JESUS, "INAU . . ."

1. Inau o matesala (S. John 14. 6).

"Ko te la lue munau o matesale esu."—*Psalm 16. 12.*

God Tur Esu Galava, Ko me gaganag lueko mun o Vavae me qeteg Visogoi :

Vavae we Esu Galava, Ko me ge pepewu keluko, wa me saru goro Ko mun o matev tanun :

Vui we Esu Galava, Ko we nanalue keluko alo line pultuwale nol :

Ka magarosa inau.

Jesus, Vavae we Toga Galava.

Ko me gaganag taurmate o nonomia mon o Mama.

Ko me gaganag o lolowia alo me wurvag o wine a Cana
(S. John 2. 11).

Ko me gaganag o lolomagarosa alo me ge mauka kel i gopae
(S. John 4. 54).

Ko me gaganag o lolotapeva alo me nomvitag o pugai, wa me ge mauka kel i mawea (S. John 5. 14).

Ko me gaganag i Ge-mulemule alo me vanan o sul tar
(S. John 6).

Ko me gaganag ape we kokor goro, wa we ave ra anama alo me varavara avune pei (S. John 6. 16).

Ko me gaganag i Qeteg Maran alo me wurvag i matapei
(S. John 9. 6-12).

Ko me gaganag i Qeteg Esu alo me na raka kel i Lazarus
(S. John 11).

Isei we ilo qalo Ko we ilo o Mama. Iniko o matesala nau te lolomaran alolona (*S. John 14. 7, 10, 11*).

Ko me toga nan o qetegin ma men God . . Iniko moma God.
Nau we momogo Iniko, alo nompepewu kel.

Ko we valawar o tanun nan, Iniko o valawar we sinar o silsiliga, Ko we gaganag o matesala mun o Mama.

Nau we wiewavae Ko.

Ka nomvitag napugak ape nau we matapei, nok o nomtup we mageregere, nok o masekeseke tagai. Ka magarosa inau, we lera naniko alo matesala, we vilewora vagoqoqo, gate pul amaiko wa o Mama.

E ! Vavae me qeteg Visogoi : Vava mun nalolok o visogoi.
Ko we magarosa o toqai we gogolo : Ka vava tamata ma munau
Ko we gilala o matev mageregere : Ka vava varagai munau.
Ko we ronotag o lolowono : Ka vava masur ma munau.
Ko we ge pea lai o nomvaruarua : Ka vava pirin ma.
Ko we pulpul alo nok o masekeseke : Ka vava varean apena.
Ko we lalakete alo nok o meregaleva nan : Ka vava vavakae munau.

2. Inau i Altag-goro we wia (*S. John 10. 1*).

“Ni we vantak nau a pan pei mapsag.”—*Psalm 23. 2*.

Nau we gilala mok Ineia nau me nomtupua ti ; wa nau me sov veta naapek ape Neia si Ni we mana we kokor goro o gene ilone nau me map ti amaia, gai nina o qon iloneia.—*2 Tim. 1. 12*.

Nau we logwia Iniko, Lord, nau tete nomvaruarua ape anaia.

Turpea nonom tegateqa ape esumiu kam te gana o sava, si te ima o sava, si ape turiamin, te saru goro mun o sava. . .
O manigiu Tamamiu we gilala si kam we maros ran iloke nan.

Nau we vareaniko Lord, ape Ko te kokor taso nau.

Nau tete vanovtag kamiu o manua : na we mule ma sur kamiu.

Nau we vareaniko, Lord, ape nau tete toga magasek lai.
Iniko vagae amenau.

E ! Gate poa aneane gai nom o gene we tano nan, Ko me sogon galtag munrasei we momogoko. . . Ko te vatnorag neira alo tano vatnorag ape Nagoma nan ragai we vonora : Ko te taur pata neira alo ima nan rasei we vavavagira.

Nau we vareaniko, Lord, ape Ko te vaesu inau nan nalinara tanun nan.

O meregale gate lav tea kamiu, nava ilone we tira ape matev tanun. Pa God we kokomag, wa Ni tete ukeg kamiu si a meregale kamiu raka sage nan kamiu te taur lai, nava amen o meregale kamiu Ni te wurvag mulan saratuwale o tano rowolue si kamiu a titiriaga lai apena.

Nau we vareaniko, Lord, ape Ko te pirin inau alo qon meregaleva we liwoa.

Tama o tanun we magarosa ira natuna, i Lord we magarosa irasei tamaine ge momogoa. O manigiu Ni we gilala ape tarapenina si tama o sava, Ni we nomkel ape nina wa si o wuwue tano gese.

Nau we vareaniko, Lord, ape Ko te nonom apenau si ta gopa si ta ronovivtig.

Inau nake gai nina o tano tamaragai, wa gai nina o ul mausa nau te pepepe kamiu ; nau me tin mok, wa na te sapalo kalo : uwe, wa na te pepepe mok wa te vaesu.

Nau we vareaniko, Lord, ape Ko te ilogoro inau gai nina o ulusui.

Inau o tavaraka kel, wa o esu ; isei ge nomtup inau, sin ge mate, pa ni te esu. Wa isei we esu wa we nomtup inau, tete mate lai ti tuai.

Nau we vareaniko Lord ape Ko me ge pea o gogolo tape matea,

Psalm 27. 1, 3.

NOK o marmararan wa naesuk i Lord nane, na te gogolo isei : i Lord we varagai naesuk, naapek te maragai isei ? Si o tavalalea sul qe mule gona goro inau, nalolok tete gogolo tea : si ira vagvagalo qe rowo vatur goro inau, na te qale toga apesov.

Rome 8. 35-ulusu.

ISEI tea te vilewora savrag nina nan o tapeva mon Christ ? Ta ganawono tea ? si o qisanwono ? si o koskos gap, si o malinsala, si o togara mamasa, si o vagona, si o gasal ? Tama me rave veta si, O manigi Iniko te ge matemate kamam val maran nol, me vasogo veta kamam tama o sheep ape tano vus. Nava alo ine nan nane nina we lalakete raka sage monina, mun Neia gina me tape veta nina. Ape na me sov veta siwo naapek si itagai tea o matea si o esu, itagai o angel nan si ra gene we liwoa goro, itagai o gene nan me rasu veta, si te qale rasu ma ti, itagai o gene nan we mana, si we eleele si we roro, itagai o gene tin we sea, si te vile wora savrag lai nina nan o tapeva mon God ilone, we toga alo i Christ Jesus i Lord inina.

God i Tin wa qale kokor goro, i Altag-goro we wia—

Inau i gene tin anama we log ronoga Iniko.

O silsiliga gate vataqav goro o sava naniko, wa o qon we sinasina tama o maran. Inau iloke, we gona alo silsiliga, we log ronoga Iniko.

Mama Turwia, Jesus Vaesu, gate sea tea, Vui we Rono i Ge Masur, inau we log ronoga Iniko.

Ka ukeg si inau tarasei nol nau we tape ineira a vanvan malakalaka vagae, we matueg avunama gai nina o vanna turwia te toga galava.

3. Inau o mategears (S. John 10. 9).

We wurvag taurmate o gene iloraka ape mategears — Tamaine me wurvag taurmate Iniko, Lord :—

“ Ge taurmate vunvun i Qeteg Vaesura mun o ronovivtig.”
—*Hebrew 2. 10.*

- Alo reremera— Nom o line manas goro.
 Nom o matakalava ape sike o lolomaran.
 Nom o poava alo lolomaran wa o lolowia.
- Alo gagapalag— Nom o mawmawui alo ima carpenter.
 Nom o lolowia sur ra reremera *nan*.
 Nom o lolomagarosa sur ra ganganor *nan*.
 Nom o maros ape ge mauka kel ra gopae,
 ra ganganor.
 Nom o varlai goro Satan¹ alo vanua vana-
 meag.
 Nom o ronovirig alo lolowono, wa alo ra
 anama me toavtagiko.
 Nom o lolovavakae, o maros-nerei, o tapeva
 we wia.
 Nom o ronovivtig alo tugei, avune Wolc-
 wolo, Nom o nonomia apenra anama
 gai nina o ulusui.
 Namateama . . me ge paso Nom o Olo-
 olo nia, wa—

Ko me waka o marana tavunana mura nomtup.

“ We vaesu lai ran irasei we mule peten ma sur God munia.”—*Hebrew 7. 25.*

- Lord Jesus— Mun o matea Ko me ge pea o mana tape matea.
 Mun o matea Ko me vaesu inau we toga rot
 mun o ganganor.
 Mun o matea Ko me qeteg Priest liwoa we ge
 pultuwale kel.

Ko me raveaglu e o tuka, we esu galava, we tira tinanai.

Ko me waka o marana tavunana mura nomtup.
Nau we varean Iniko, Lord.

Lord Jesus, Ka ge inau na sar ape tapeva we poa iloke.

4. Inau o Tavaraka Kel (*S. John 11. 25, 26*).

Inau we nomkel o tupei alo tauwe alo gap matava, o mewu gale toga alo valis. Nau we nomkel o siopa tape tamate we luqe aia, o vat me wil reag veta. Nau we nomkel rapulsalama we nomtup, me malakalaka ran. Nau we nomkel o tano-
isar, wa o tano-pismarawa—

Wa, nau we vareaniko, Jesus.

Inau we nomkel si Ko gate sea tea. Nau we nomkel a pan qilo alo maran qara teve, o av mantagai aia, o iga we taurmate ape ganagana. Nau we nomkel i Peter, wa Ko me nom-
vitag napugana—

Wa, nau we vareaniko, Jesus.

Jesus— Ko me mate ti avawo Calvary, wa alo qon vatoliu me tavaraka kel, o sawal tagai nan o matea—

Nau we logwia Iniko.

Ape o matea tete ge mot lai o ga-tapeva,
Ape o risa rorono alo qarana tete mau, wa
Ape o matea o mategeare esu galava,

Nau we logwia Iniko.

Ape o masaoqon, o tano si o lama tete vilewora lai naniko :

Ape, alo Iniko, tagai o veve, si o gato, si o savasava, si o togara masmasawora te vilewora lai :

Ape ra nomtup nol we toga tuwale alo Iniko, ragai me van veta nan o marama iloke, wa ragai qale toga, wa ineira gate wota tiqa :

Nau we logwia, we wievavae Iniko, amen o Mama wa o
Vui we Rono. Amen.

Lord, Ka ge si o ganganor nipea riga goro naturiak iloke,
pa ka lav naturiak o gene oloolo we esu, tama me tavaraka
veta nan o matea.

Ka ge wasawasa inau nan o ganganor si nau te rowrowovag
mantag muniko, si na tangemarmaros muniko, wa alo ulusui
na nina amaiko avunana,

5. Inau o Bread (*S. John 6. 48, 51*).

O siv-corn we masu alo tano wa we mate — Tamaine, Iniko,
Lord, me map reag Nalenasima wa me mule alo malumalu
matea.

O corn we totou, o noliu amoa, paso nan o wutui, paso nan o
sinaga matua alo wutui — Tamaine, Iniko, Lord, me poa taso
wa me lolomaran saratuwale, wa mun o lolowia amen God wa
amaira tanun nan.

We qisan o siv corn we matua alo vatitne vat galolo sin ge
o flour nagara sul — Tamaine, Lord, me vusvus, me qisan
Iniko, si Ka na-esu o veve sul nan.

O flour we mule raveaglua o av sin ris bread, ape ge mule o
tanun nan — Tamaine, Lord, Ko me raveaglua o av, o gale-ilo
wa o galeva, si Ko te sogov lai munragai nan alo we tira.

O bread we wia we varagai o tanun nol, neira maremare ape
mawmawui nia — Tamaine, Lord, Ko we varagai wa we ge
mule iragai we gana nomtup Iniko alo toqara.

Lord— Alo gene mantagai gap nau we anumag apena valqon,
Alo nok o varlai goro o meregaleva valqon,
Alo we tira si na ronomaui wa we malumlum,
Valqon . . Ka vanan inau.

Alo naturiak gate wia, alo nau we vagona,
Alo nau we ronovivtig, we malewa, alo gopae,
Alo we mageregere, alo malumalu matea,
Ka vanan inau.

Alo atak ran, alo nok o varlai we toga pata goro o
ganganor,

Alo nok o ge-ilo ape nom mataketake inau kel,

Alo masaoi nau we nonom ape leasag,

Alo qon nau we maran si we apemot,

Lord, Ka yanan inau.

6. Inau o Vine (*S. John 15. 1*).

S. John 15. 5-8.

INAU o vine, kamiu o wanarai nan. Isei qe goara alo
inau wa inau alo ineia, ni te uwa linlin ; ape asasan
nan nau kamin tete ge lai o sava. Si isei qe tete goara
alo inau, me savrag reag veta ineia tam o wanarai, wa me
kor, wa irasei te vile tuwale ineira, te savrag ilo avi pa
we gao. Si kam qe goara alo inau wa mok o vavae nan
qe goara alo ikamiu, tur paere ape savasava nan kam we
maros, wa te lai ran mun kamiu. Iloke o gene i Tamak
we ronoga apena, si kam qe uwa linlin ; wa kamiu te
qeteg tinqoro anak tamaine.

Ko me Toga, wa we Toga, tete paso lai,

Ka ukeg inau nan goara amaiko ran.

Alo malumalu tape Panema, alo Tamata Galava namoma,

Lord, na goara amaiko.

Iniko o Vine, ikamam o tanun anama o wanarai.

Lord, si na goara taso amaiko,

Namatevuma ni kalo alo lolok.

Alo Nom o Ronomalumuaga,

Alo Nom o Tapeva Turwia,

Alo Nom o Matartoga, o Nun, wa o Maros-nerei,

Lord, na goara amaiko.

Amaiko alo mana tape Nom o Tavaraka kel,

Amaiko alo vunana Ko me kalo pata aia,

Lord, na goara amaiko.

God Turmana, kamam we nomtup apen Jesus Christ, Natuma wotuwale, i Lord kamam, me mule kalo ivunana : Ka ge kamam mulan a mule kalo aia alo lolomam mun nomam o nonomia nan, si kamam a goara tasovule amaia : Ni we esu wa we maranaga amaiko wa o Vui we Rono, God Tuwale, o ulusui tagai. Amen.

Jesus, Ko me toga nan we tuai ma, pa Ko me siwo ma amaira tanun nan, wa me togatoga tama o tanun. Ka pirin inau alo val gene we tira munau, ta poa ta mantagai, alo nomvaruarua, alo lolowono, alo gene nan we sagesaru, si nalolok a toga masur alo Nom o Tamata ti galava.

Jesus, Ko me toga kokot ti alo turie tanun, Ka pirin inau, we gona we seasea, na toga wasawasa alo lolok, na goara amaiko alo Nom o tapeva we tawela.

7. Inau o Marmararan (*S. John 8. 12*).

“God o Marmararan, wa i tagtagai tea o silsiliga alo Ineia.”
—*1 S. John 1. 5.*

Iniko o Marmararan, wa Ko we toga alo marmararan isei tete peten lai Ko aia. Inau, talo tano, we silsiliga, we qon, we kaka napanek muniko.

Iniko o Marmararan we valawar valsei we mule ma ilo marama. Inan, namatak we pei mun o qurega wa o ganganor we tias Iniko nake.

Iniko o Esu, o Maran, o Tapeva, Ko we sinar nalolora tanun nol mun o valawar tavnnana, inau o nomqerqeret alo marama iloke, nan we tiasiko, Ka valawar, Ka ave inau.

Lord— Ka ge inau na maros vagae Nom o Marmararan :
Ka ge si nau nipea gogolo si apemaragai we sike Nom o Maran o manigiu nok o gagapalag gate wia :
Ka pirin inau na tataga o tur Marmararan, na nipea leralera nan o matesala we wia :
Alo nok o qurega, alo nok o nomvaruarua, alo nok o nononom ape inau kel . . . Ka valawar pirin inau.

Nau we varean Iniko Lord—

Ape matak we iloilo lai.

Ape val gene we lulum wa we tano alo matak tape marama iloke.

Ape Ko me valawar inau mun o gilaglala Iniko.

Ape Ko me log lue inau nan o siliga ilo Marmararan.

Ape Nom o Vavae o pul ape ranok, wa ape we sinar namatesalak.

Ape Ko me ge pea o silsiliga tape matea mun Nom o o tavaraka kel.

God i Tin o Maran—Nau we wiewavae Iniko.

Jesus o Marmararan—Nau we wiewavae Iniko.

God Vui o Valawar—Nau we wiewavae Iniko.

Lord Jesus . . . Ka vatran ma nom o marmararan wa nom o nun, a tursalemoa inau : a vantak inau ape tauwema we rono, wa ape tano vano toga auoma.

O VAVAE NAN O WOLOWOLO.

1. " **Mama, Ka nomvitag neira, ape neira gate gilala o sava neira we ge.**"—*S. Luke 23. 34.*

O wolowolo we risa taurmate alo tano. Ra tavalalea we petpeten ma si neira a matag Jesus alo Non o Ronovivtig. Ira soldier we tuqerag siwo Jesus, we taur vagaret napanena, we woso raveagluea o pismarawa. Jesus we ate kalo ivunana, Non o vavae wa, Mama, Ka nomvitag. Me woso o tuara panei, we wosa naranona. Neira we la kalo Jesus vag o wolowolo, we ukeg siwoa alo qarana me taurmate apena. Jesus we ronovivtig we poa, pa o vavae vasir tagai . . pa o vavae tapetape tataga matev God :—

Mama . . O varagai apena alo vavae iloke, God qale tapetape Jesus, wa iragai *nan* we ge manaras Ineia.

Nomvitag . . O mana alo line nomvitag pugai . . Jesus me ilo o sul we gevtagia we ris ira rono anana. Jesus we ilo iragai we nomvaruarua we magereregere we ris ira Christ we tira netenete. Ira pulsarana we gogolo we ris ira vavakae anana.

Jesus, Ko me vava ti si te la kalo Iniko Ko te ramo o tanun *nan* suriko—Ka ramo inau, o manigiu Nom o tapeva we lava.

Jesus, nau we ilo Nom o magariosa we poa, Nom o nomvitag we liwoa, wa nau we ilo nok o lologona, o meromero, o *nustup* rorono.

Nau we nomleas apena, Ka nomvitag napugak, Lord.

Lord Jesus Christ, Ka tuan ma munau o matevui we mama-garosa, Ka ge pea nan nau o nonomia nol ape ge vavakae isei, Ka ge pea nan nau o line raparapa nol, Ka tuan munau o rono-malumuaga, Ka ge inau o masara alo loloi tama Iniko, Ka pirin inau na tataga o makaliu iloke Ko me map ti, Nom o tapeva ni sina lue alo inau tama o tapeva Namoma me sina lue avune Wolowolo.

Oloolo tur Rono, nau we vareaniko ape gene we wia nol Ko me taur munau, wa ape Nom o ronovivtig we qoqo Ko me reverag ape nau.

God me tape tamaine o marama, wa Ni me ukeg Natuna o wotuwale, si isei qe nomtupua tete mate, pa te taur mona o esu galava apena. . . Jesus me mule kelkel, me gagapalag wia : Ni me vaesu ra gopae nan : Ni me nomvitag napugara ganganor nan : Ni me vanan ra malinsala : Ni me varagai iragai we gogolo : Ni me ge masur iragai we sur siwo : Ni me tataro apenragai me ge mate Ineia alo me wosowoso Ineia ape Wolowolo. Ni we esu galava nane si a tataro tinanai mona ape nina : mun Non o Wolowolo wa Nanarana turvia Ni me tunkel nina.

Jesus, Ka pirin inau na nonom apen valsei tama si tur tasik : Ka ge inau te gaplot ape nomvitag iragai we ge tatas munau : Ka pirin inau si a taurmate vagae ape pirin irasei ta gona tea : Ka pirin nau ape nonom vagae ape gagapalag mantag wa ape nom vasarig apena : si nau tete vinvin, tete lologagara gaplot, tete sike soqosoqo napulak, pa si na tataga namakalima. Iniko mun Nom o Wolowolo wa Nanarama me tunkel kamam ; E ! Vaesu marama.

E ! Tunkel tur Rono, Pulsalak wa Tasik, si na gilala mantag Iniko nan amoa, si na tape Iniko nan amoa, si na tataga arivtagiko nan amoa.

2. "Qarig ko te toga amenau a Paradise."—

S. Luke 23. 39-43.

Jesus we qeteg ilo o lakalaka me tira taurmate ti munia,
ilone nane Ni me rono malumuaga o Wolowolo apena.

Rara o vuspal we ilo we sasarita gese, tuwale we esu apena,
o tuara gate sea. We gona mun o vuspal a nomtup mun o
nomleas nake. Non o togara me tatas wun te ge ineia ni nom
varuarna apen Jesus te tingoroa, ni te apemaragai ape paere.
Wa, Jesus nane, iragai we tatas me lalakete goroa, ni we ilo
Jesus nake tama ise i gene vasigtag gap.

O lolomalulum mon Jesus we ramoa. O vuspal iloke we
lolomaran sal ra Sala liwoa alo ike. Ni we ilo qalo si—

Iloke gate o ulusui :

O wolowolo iloke o Tano-Maranaga :

I gene ganganor iloke o Maranaga we Mana :

I Pepewu iloke, me ukeg kelua, Ineia i Riga goro nol.

O vuspal gate paere si a ukegia nan o veveg ape pugana,
nava si, Ka nomkel inau.

Lord Jesus Christ, inau o pal, inau me gogoroi naniko nok o
tapeva, nok o nonomia, naturiak, nau gate alena mantag,
namasaoqonik nan nau we nonom ape nau kel alolona wa me
gevtag Iniko. Nau gate sar a paere o sava amaiko, nava Nom
o tapeva we poa iloke we ge inau na sike suriko. Lord, Ka
pirin nau alo nok o apemot, Ka pirin inau alo nau we nom qalo
ape pugak we poa, Ka pirin inau na ilo si o magarosa we lava
amaiko wa o nomvitag pugai tete pea. Ka ramo nau nan nok
o variava nol, Lord. Ka nomvitag napugak.

Ilo ! Nau me rave veta iniko alo tawtawere panek.—

Isaiah 49. 16.

Nau tete loloqon iniko.—*Isaiah 49. 15.*

E ! Tuunkel tur Rono, Pulsalak wa Tasik, si na gilala mantag
Iniko nau amoa, si na tape Iniko nau amoa, si na tataga
arivtagiko nan amoa.

3. "Vavine, ka ilo natuma . . ka ilo i ravevema."

—S. John 19. 25-27.

Raveven Jesus we tira ape wolowolo. Alo iloke wun Saint Mary me ronotag mulan o vavae non o Angel, was, We wia, Mary ; we nomkel non o vavae, Naesuk we log ronoga i Lord ; we ilo mulan o ime tawu, o matesala alo we toa i Misraim : te nomkel mulan o qon nan a Bethlehem, a Nazareth : alo vanua nan we seasea alo ni me tataga Jesus alo Non o vanoga. Raka sage wun, te nomkel o vavae non Simeon—o gasal te as raveaglue naatama kel. Nanaran Natuna we sale : o surmata non Mary we sale mulan.

S. John we tira ape wolowolo mulan, i lolovavaka, i lolomaran, o mala, i tinqoro Jesus we tape ineia.

Jesus we ilo irara. Me wosag Natuna nan Mary, ni te nonom apen tuwale we sea. S. John me toavtag ra anana wa me tataga Jesus—ni te nonom apen o veve we sea, ro Mary.

Jesus avune Wolowolo we vatira Non o vavae alo tataro—Nom o maros ni lai. Irara iloke we ge tataga, me ge qalo o Maros mon Jesus, me manas goroa, me ronovirig ape ge qalo o vavae mon Jesus.

We wia, Mary, iro gene sogov, i Lord amaiko. Te logiko iro gene vawia amaira vavine nan, wa nawotoqama i gene vawia mulan.

Lord Jesus Christ, Ka pirin inau na mawui vagae ape Nom o Maros turwia. Ka pirin nau na vava wa, Nom o maros ni lai. Inau iloke wa val gene napulak Ko me tin wa Ko me la munau. . . . Ka pirin inau na ukeg kel muniko, Nasasama ni Rono apena, Nom o marana ni mule ma nia. Christ we esu galava, Natun God we mana, nau we ilo suriko ape sogov wa o piriniva si na mule taniniga ape Nom o Maros nol.

Inau Lord, i gene anama, Ka ge inau na toga alo qonik nan tama Ko me toga ti.

E! Tunkel tur Rono, Pulsalak wa Tasik, si na gilala mantag Iniko nan amoa, si na tape Iniko nan amoa, si na tataga arivtagiko nan amoa.

4. "God inau, God inau, ape sava Ko we toavtag inau ?"—S. Mark 15. 33-36.

O vavae we vagis iloke, we gona sal we vavaul apena.
Inina we monog rorono lai apena magasenina.

Alo ike o siliga me gara goro veta ; o siliga talo marama we tenegag o siliga alo toqan Jesus nake. O ronovivtig we liwoa we ge Jesus ilokenake . . alo turiana . . alo atana.

O vivtig tape Wolowolo, o marou, o nonomia si Ni me vatogo matila, gate ilo lai tea ape anaia, Satan we anumagia. O pug talo marama we qisqisan Jesus, we tama si napugana, ape . . me ge i gene gate gilala ganganor, sin ganganor, leas inina.

Nina we gilala si alo iloke Jesus me rig napuganina wa Ni te ronovivtig tamaike ape o Mama tete toga lai vag o ganganor.

Jesus gate vava Mama ilokenake. Ni me vava si God inau. Alo siliga tape ganganor iloke o nonomia ape Ineia Natun o Mama wun we toga pata galtag. Pa ilo si o nomtup mon Jesus gate tagea, Ni qale vava lai, "**God inau.**"

Ape sava Ko me **toavtag** inau ? Iloke o tur ronovivtig, iloke o tur veveg ape ganganor, o vilewora nan God—Jesus me ronotag leas nina.

Ape sava Ko me toavtag **Inau** ? Ape sava we toavtag o Natui o meratape, o sava me ge si iloke te qale lai ?

Ape sava ? Inina we gilala si o manigin inina ira ganganor a esu lai.

Ni me magasei si rasei we sea te toga masur :

Ni me toga qon si rasei we sea a toga alo Maran :

Ni me mageregere si Ni varagai lai ragai we sea mun
Naturiana wa Nanarana.

Ineia iloke o no-sin alo qarana o malumalu matea aia. Amaia inina we gilala si we van taso alo siliga gai nina o Maran wa o Lenas liwoa.

Na ta mule alo malumalu matea, na tete gogolo o mateawota ape Iniko amenau. Nom o qale wa Nom o kerei we pirin masur nau.—*Psalm 23. 4.*

Mama, na we tias aperig Iniko, Ka sagarag magarosa inau we mageregere : Ka ge sipa nan nan o gene *nan* we tatas we sarape pugak : wa Ka vasoal ma mun nau si na sov wa a matueg avunama magesema, i tur magarosa ; mun Jesus Christ i Lord kamam, Ineia tuwale, i Tinanai, i Tataro apen nau. Amen.

5. "Inau o marou."—*S. John 19. 28, 29.*

Jesus me vava ti, Inau o Matesala, Altag goro we wia, Mategeara, Tavaraka kel, Bread, o *Vine*, o Marmararan. Ilokenake—Inau o maron. Val vavae we gaganag Non o gagapalag we piririn o tanun nia.

O maron iloke tape turiai—o takelei tape Ronovivtig non Jesus o manigiu inau. Christ me ronovivtig, qeteg a Gethsemane, amen Annas, Caiaphas, Pilate, Herod, amaira we porosagia, we lamalama Ineia, we towosia, alo matesala Ni me mulevag o wolowolo aia, avune Wolowolo nake. . . Iloke nol we tuan sage o marou we poa.

Jesus, alo Turiamama Ko me la kalo napugak. Napugak iloke Ko me ronovivtig ran apena. We nun, Ko me la moma nok o lolowono *nan*, na tamata lai apena. Nau we vareaniko, Jesus, Lord, Vaesuk.

Jesus, alo Turiamama Ko me ronotag o vivtig *nan* we qalo inau. Alo iloke nau we ilo qalo Nom o matev Tanun, wa Ko we magarosa lai inau. Lord, Vaesuk, nau we vareaniko apena.

O marou iloke tape atana. Ragai we lolowono, Jesus we toron ran we ge masur : ira we tavalalea munia, we toga wasvat, Ni we toron we ge ris : iragai we sotsotal kelura alo nor o variava Jesus we toron we ge pepewu alo lolora : ragai we toga qon Ni we toron si a valawar, ge lolomaran ineira ; Ni we toron si a vaesu inau.

Tuwale we ge ilo si a pirin Jesus, wa Jesus me lav non o piriniva.

Jesus, Ko me lav magarosa o gene *nan* iragai me la muniko ti alo qonima alo marama iloke, o bread wa o iga, o lig puna-

puna, o sinaga, wa alo iloke o tapeva non o soldier tuwale. Lord, Ka lav magarosa nok o tapeva we mantagai, Ka lav magarosa nok o gagapalag we mageregere, nok o nomleas, nok o ge ilo si a wia, nok o line ora goro wa o gargara mamasa. O sava nau we ge gate wia, pa Ka lav Lord wa Ka ge tama Ko we maros nia si Ko te masur apenau. Lord, Ka lav inau na pirin ape gagapalag qalo Nom o maros ape sul, neira qet ma suriko, Naatama we Rono Ni masur ape neira.

E! Tunkel tur Rono, Pulsalak wa Tasik, si na gilala mantag Iniko nan amoa, si na tape Iniko nan amoa, si na tataga arivtagiko nan amoa.

6. "Me paso."—*S. John 19. 30.*

O nonomia nol Jesus me van ma apena me ge vunvun qet. Ni me ronovirig nol. Alo Non o togara nol i Vavakae we tira nev. Alo Mateana iloke i Vavakae Vaesu . . . we ge vunvun o Oloolo ape pugara tanun nan.

O tanun we tira ape Wolowolo we varus lai, Avea ra tinqoro? Avea ragai me taur ti o bread? Avea ineira Ni me vaesura ti nan o gopae? Avea ragai me mulevag o no-metigtig anarisa? Me paso. We, wa me pea.

Jesus we gilala si o gene nan we taurmate qet—

O Altar we tira galava :

O Lamb o Oloolo we mana galava :

O tano-ulsavrag pugai apena tete sisim lai ti tuai :

God wa Tanun we toga pulpul kel.

Jesus me waka o marana tavunana munra nomtup.

Jesus we ukeg mun o tanun nan, Ravevena, Non o marana iake, Non o Tamata. Jesus te mule, ira tanun nan a tasovag o gagapalag, o tanun nan a manasag o Linai, we ronovirig o manigi u o ronoga non God.

Lord, inau iloke gate pulak kel, inau i gene anama. Ka ge inau na togotoga tama Ko we maros. Ka riga goro inau tama Ko me riga goro Iniko kel, Ka varagai inau na ronovirig taso alo matesalama gai ge paso o sava Ko we maros inau apena.

Jesus, mun Naqatuma we Rono me vilvilqat mun o wola-
kaukan, Ka taur nok o nonomia. Ka wurvag nok o nonomia
nan o gene *nan* gate wia, nan o nonomia we gagavu, we lepa,
nan o nonom tatalaiga. Ka pirin nau si na nom qalo mantag
wa si na gagapalag muniko mun nok o nonomia nol.

Jesus, mun Nanagoma we manaranara mun napanera tava-
lalea, Ka lav nanusuk. Ka wurvag neira nan o vavae we
tatas, nan o vavae we lepa wa nan o vavae tea gate wia. Ka
ukeg si nok o vavae we pirin vagae o nonomia we wia. Mun
nanusuk nau te logwia Iniko, Lord.

Jesus, mun Nakikima we as raveaglué mun o isar, Ka taur
nalolok, Ka vatogo inau na maros gese o sava Ko we maros, na
nustup o gene *nan* Ko we nustup, wa na tape o gene *nan* Ko
we maros nau te tape neira : inau i gene anama.

7. "Mama, nau we sakarag naatak ilo Panema."

—S. Luke 23. 46.

O tuaniu ra anana arivtag, ira Angel wawaliog, o vavae
we poa ape lalakete wa o ronovivtig mon Jesus me paso. Alo
moai wa alo paspasoi Jesus me log o Mama. Jesus me
mana we ukeg matapuna Naatana. Naturian Jesus avune
wolowolo we tenegag Non o gagapalag apen ra ganganor.

Naqatuna me tul siwo muneira,
Ni me kaka taurmate Napanena ape lav vasgot neira,
Nanarana we sale si a vasugvitag ganganor nia.

Sin nonom vitag pugai nol,
Sin varono nina,
Sin waka Non o marana
Mun Narana rono.

Ranoi we mataqa—Ave naranok.
Panei we mataqa—Kokor napanek.
Valai we mamasaiiga—Sano navalak.
Matai me tipag goro alo matea—Tigoro namatak.

Qatui me vil mun o sakariu—Geara nok o nonomia.

Loloi me as raveaglua mun o isar—Nit nalolok suriko ran.

Turian Jesus me mawora, me la kalo nan o tano si a ramo o
tanun *nan* suriko . . Turiai we Rono we wurvag kamam
alo we oloolo Ko.

Bread tavunana valqon Ko we wurvag alo lolomam o line
tamatua turwia namoma, Ka wurvag inau gai taurmate ran.

Iniko, Maranaga avune Altar iake, Ka lav magariosa nok o line
momogo : nau we kalo alo Nagoma mun o varean wa o
wievavae wa we momogo Ko.

O SOGOV VUI LAVEARUA.

1. O Sogov Vui we Rono—"a momogo Ko."

—*Vavae Tenegag 1. 7.*

Isei me lav suar o line sogov iloke we ilo suar—

Namatevun Christ alo Non o nonomia,

Namatevun Christ alo matevuna kel.

Mun iloke, ni we *nom mava mantag God*, we gogolo ape leasagia si ape tames goro Non o Maros, gate ape ni we gogolo o veveg apena, nava o manigiu ni gate maros we valuava o Maros mon God, ni gate maros God te lolowono ape neia.

Mun iloke ni te *kata sur God*, isei si o sava tete rave reag lai ineia.

Mun iloke ni te *tape God*, wa non o tapeva sur God te poa-poa taso.

Ni te ilo si *ni we gogolo o ganganor* mun o gogolo liwoa, we kikina.

Ni te ilo si *ni we nustup maremare o ganganor*, te tatas ran munia.

Ni te maros *toa nan o ganganor*, nan wa ge ava alo Nagon o Mama.

Lord God o Vui we Rono, Ka pirin nau a nom mava o gene nol we Rono, Ka vaesu inau nan o nonomia sur siwo, nipea ukeg inau a tira goro Nom o gagapalag amenau.

God, Vui we Rono, Qeteg Maran nol, Ka lin siwo ma nasinosinoma ilo lolok, si nau te ilo vaglala napugak nan, tama

nau te ilo neira alo na te tira alo nago tano veveg non Christ. Ka vatogo inau ape gene *nan* nau me ge ava mok, wa ape ilone inau me ge isei we sea sin ge. Ka ge inau a ilo qalo avea nau me valuava alo Nom o gagapalag. Ka ge inau a ilo mantag ran ape nok o variava alo Nagoma, wa mun ratagvanuak, wa o gene *nan* we tira si na ge pa nau gate ge, wa ilone nau me ge ava apena. Nipea ukeg nok o sotaliva a ge goro inau nan wa ilo naturmatevuk. Lareag o marav nan namatak wa nipea ukeg o sava a ge goro inau nan wa ilo mantag, wa ape gaganag lue napugak; Ko we esu amen o Mama wa o Natui, God ti tuai, ti tuai. Amen.

God, Vui we Rono, Iniko alo Tano-Vasugrono me van sur nau, na we tiasiko si Ka vapo a alo lolok Nom o Sogov lavearua tape qon Varagai.

Ka ge si na momogo God, Iniko o Trinity we Rono, mun o tur nom mava wa o tapeva, si na nustup val gene gate wia: Ka ge-rono inau si nalolok sur o Mama gese, Ka wurvag inau na lolomaran ape matevuk si na wia nan amoa: Ka manag inau si na tira netenete lai wa a ge vunvun o sava Ko me vatran inau apena: Ka sogov munau na ilo qalo Nom o Maros wa te mawui ran apena: Ka valawar inau na lolomaran Nalinama, wa Ka pirin nau na pulpul amaiko, Nom o sogov ni nit inau suriko ti tuai ti tuai. Amen.

2. O Sogov Vui we Rono—"ge rono."

—Rome 8. 14-16.

Iloke we ge inau a nomtup mantag God o Mama, we ge namatevuk we toga apesov, we matueg ran avunan o Mama, vag o tapeva tama o natui sur tamana. O nomvaruarua tagai, wa mun o lolopepewu we manas goro God.

God o Vui we Rono we van ma sur nau, we gagapalag o Maros mon God alo lolok si na ukeg munia. Ni we tak ma o Tapeva, Mana, Ronova, Lailai, wa o Pultuwale—"irasei nol o Vui non God we vanogagira, ineira nane ira nanatun God. Nau gate lav mok o vui garotrot mulan si a gogolo, nava me lav mok veta o Vui ramramo, wa alo ilone nau we log si Abba, Mama."

God, Vui we Rono, Ka ave inau si na ukeg qet inau kel, na natun God we nun, na goara tuvale amaiko, wa o Mama, wa o Natui, ti tuai ti tuai.

God, Tur Tapeva, nau we vareaniko ape Ko me tenegag Nom o tapeva wa o lolowia sur nau, mun ragni talo sogok, ira pulsalak *nan* we wia. Nau we vareaniko ape neira me piripirin inau alo marama iloke, wa ape nau we ilo nia o niniai tape Nom o lolowia sur nau, Ka pirin inau a toga mun o varean sur ineira ira pirinik alo marama, wa raka sage muniko, Mama, wa o Natui, wa o Vui we Rono. Amen.

God, Vui we Rono—Ka pirin inau a nomtup varean o Mama.
 Ka pirin inau a tape mantag o Mama.
 Ka pirin inau a toga tama o tur natui we wia.
 Ka pirin inau na mawui goro o Mama.
 Ka pirin inau a lav mantag o line vata-nau ma amen o Mama.

Ka pirin inau a ukeg nau kel tara ra anak nol ilo Panema, Mama. Nom o vavae wurvag ge wenewene inau, Nom o malumlum ge liwoa inau, Nom o varagai ge tamata nalolok, na goara mun o nomtup wa o apesov nau gai nina amaiko alo lenasima, Ko we esu aia amen o Natui wa o Vui we Rono, Trinity turwia.

3. O Sogov Vui we Rono—"Vui ge gilala wurvag."—*Nanalue* 2. 23.

Mun iloke o Vui we Rono we na lolomaran inina ape nina kel, wa naturmatevunina, wa ape sale gene *nan* talo marama iloke. God o Vui we ge nina a ilo qalo o nun.

O matesala Ni we gagapalag alolona apena :—

- (1) O Raverave we Rono—2 *S. Peter* 1. 21.
- (2) Alo gene *nan* we qalo ma—*Gag.* 16. 7.
- (3) Alo lolo tanun—*S. John* 16. 8.

Nalinana tur malumlum,
 Nina tingoro lai,
 We norov goro nina nan
 Val ganganor.

God, Vui we Rono, God Turmana, nau we momogo Iniko ape Nom o ge ilo vaglala inau ape ganganor, wa ape line tani-niga, ape veveg te anaïsa. Nau we momogo Iniko we mana goro naatak, we ge manoanoa lai natoqak we maremare ape leasag, we ge masur nalolok we wono, nan we momogo Ko ape Ko we ge inau o matapei a ilo mantag, Ka ukeg ma si nau ilo, si na nomleas mantag, si o woai tape nomleas a poa amenau. Amen.

God, Ka pirin nau si na nipea apemot wa si na ronomaui alo Ko we norov goro inau.

Vui Esu, o marama we uravag Iniko :
 Na we momogo we tape Ko.

Vui Marmararan, i Vatvatogo o nun nol :
 Na we momogo we tape Ko.

Qeteg Sogov nol, talo tano si tavunana ma :
 Na we momogo we tape Ko.

Qeteg lolomaran nol :
 Na we momogo we tape Ko.

O manigin Ko me tin inau, Ko me sogov munau,
 Ko me vatogo inau, Ko me norov goro inau,
 Ko me ronomaui ape nau, Ko me vaesu inau :
 Na we momogo we tape Ko.

Mun o lolotitin tape atak we esu kel,
 Mun o tapeva talo toqak we pepewu,
 Mun o tur line momogo tape toqak we vareaniko,
 Lord God wa Qeteg Esu :
 Na we momogo we tape Ko.

4. O Sogov Vui we Rono—"o manag."

—*Psalm 68. 35.*

Inau te maremare nia ape tira goro Satan, wa o visogoi,
wa o marama.

Inau te vavaka lai ape gaganag we tira apen Christ.

Inau te maranaga goro lai namatevuk, ni toga sur mun
Christ.

Nau we nomkel, Lord, si alo we tataga Nom o Sogov, nau
we mano lera alo nok o nonomia : inau we nonom ape Nom o
Sogov wa gate nonom apeniko, tama si te vilewora lai Iniko
wa Nom o Sogov. Nau we gilala, Lord, si Iniko moma o
Sogov, wa alo iloke Iniko moma we tira pirin nan, i Varagai, i
Pulsalak we mana. Lord, Ka pirin nan a ukeg qet nau
suriko, nau nipea ge goro tea Nom o Maros alo inau.

Ira pulsalak o tanun we anumag inau ape ge o gene *nan* nau
we lai veta apena. Iniko Pulsalak ma vunana we manag inau
ape ge o gene *nan* nau gate lai matapuk, magasek, apena.

Lord, Ka manag taso nau.

God Mama, Ka sogov munau mun Nom o Vui we Rono, o
nom mot tete sea lai, o nomtup netenete tete makoekoe lai, o
lolotitin ape Nom o Marana ni poapoa alo marama iloke, mun
Jesus Christ i Lord inau. Amen.

Jesus, Magarosa—Ko me *nala* pa gate mapsag nan Nom o
gagapalag :

Ko me marou pa qale tirag taso o pei vaesu :

Ka ukeg munau iloke we veverag o gagapalag wa o titkeliga
tape *qon nan* nake, si na nipea mot o gagapalag we wia o
manigiu inau we *nala* : wa, si naturiak we siwosiwo apena, Ka
ge garaqa naapek valqon si na tur Sala tape Nom o Marana
we wia.

5. O Sogov Vui we Rono—"o ge vasarig."

—*Psalm 32, 8.*

Was, na ilo vaglala o Maros mon God, wa si a iloraka o sava te tira apen God te ronoga apena. Nan te irvitag nan o gene gate tur wia, wa te iloraka gese o gene turwia.

God, nan we vareaniko ape Ko gate ge pea inau o manigiu nok o lerava ti. Na we tiasiko, Ka pirin taso inau—alo nau we nomvaruarua, alo o tanun we rave seasea inau, alo nok o nonomia we qon—Ka ave taso inau.

God, Ko me vatogo natoqara sul anama we nomtup, mun o suware at mun neira o valawar Vui we Rono : Ka vasoal ma mun nau o Vui ilone, si na nom mot qalo ape savasava nan, wa a toga lolovatawasai galava mun Non o varagai we rono ; mun Jesus Christ i Vaesuk, me gagapalag sar ape nau, wa we esu we maranaga amaike wa o Vui alo matev God tuwale, o ulusui tagai. Amen.

6. O Sogov Vui we Rono—"ge lolomaran."

—*2 Cor. 1, 10.*

Mun iloke o tanun we ronotag qalo lai, we taur o gene vagis tape linan Christ : was, we taur qalo lai o sava God me ge ape Vaesunina, wa o sava God qale ge si a vaesu inina.

Lord, Ka ge lolomaran inau, na ilo qalo apeniko, na la o tinegaro alo we sike tataga Nalinama, wa alo savasava we pirin inau si a lolomaran Iniko. Iloke o esu galava, si na lolomaran Iniko God tuwale wora, wa i gene Ko me vatrana, Jesus Christ. Ka vasoal Nom o Vui we Rono, Ni sogov munan, Ni mana alo inau, na gilala Iniko God Turwia.

Lord, nau we wievavae Iniko ape linara Prophet, Priest wa Maranaga, Ko me manmanasag Nalinama amaira amoa. Nau we wievavae Iniko apen S. Mary, Qilowar turwia, Raveven Jesus, o manigiu Jesus me wota ma amaia. Nau we wievavae

Iniko apenra Israel we wia me nomtup Jesus alo Ni qale toga-toga alo marama, apenra Sala nol, ragai me rave o Lea we Wia, wa ape neira nol we manmanasag Nalinama gai nina nake. Ka pirin inau na taur varaget a lea vatogoa namora, wa si nau usur taso tama Ko we maros ; mun Jesus Christ i Lord inau. Amen.

God, Ka ge lolomaran inau ape Matevuma, we Rono, we Lolowia, we Mana, we Magarosa. Ka ge lolomaran inau ape Nom o Maros, Ka ge inau na taur mantag Nom o Nuu—

ape i Vavae me visogoi,

ape Non o Ololo si a nomvitag pugai nia,

ape Non o Tavaraka kel we lenas,

apen Christ we visogoi mulan avawo Altar si a vanan inau,

ape nonomia nol tape vavae Emmanuel, God amenina.

God, Ko me ge si alo Sacrament we Rono tape Altar, Ko we vaglala mun kamam Nom o Ronovivtig alolona : Ka ge si na nomtup momogo o Gene vagis nan we Rono tape Turiamama wa Nanarama, si na ronotag suar alo lolok o mana esuva tapena : Ko we esu amen o Mama, wa o Vui we Rono, God Tuwale ran, o ulusui tagai. Amen.

God, Vui we Rono, Ka pirin inau, Ka siwo avunak, o tanun anama, wa vatogo inau na vava o sava alo tataro, ape nalolok we qon, wa nau gate gilala mok.

7. O Sogov Vui we Rono—"ge matanur."

—Row. 33. 11 ; V. Ten. 18. 24.

God Vui we Rono, Ko me vawota inau alo Tano-Vasugrono, me ge inau na merein God :

Ka ronotag nok o tataro nake.

God Vui we Rono, we sogov mun nau o maros ape tataro :

Ka ronotag nok o tataro nake.

God Vui we Rono, Ko we tataro amenau wa alo lolok :

Ka pirin nok o tataro nake.

Nau we gilala si Iniko, Lord, i Pulsalak, Iniko i Ge Masur, i Varagai naatak, Ko we goara pulpul amenau, Ko we ge nau a gilala si Jesus we to gatoga amenau, wa Ko te wurvag inau si na tuwale amaira gene vawia we matartoga wa we ilo mora God. Nau we sike o pulpul Namoma, was Iniko; nau we sike o sogov mon Jesus, was Ineia; wa nau we sike o Tapeva mon God, was God ran. Nau we maros si na toga pulpul amaiko, Trinity Turwia, namatevuk gai uravag Namatevuma. Ka ge mot nok o ge ilo ape tataga Namakalima, wa Ka taur, Ka pultuwale amenau, si Iniko alo inau we riga goro nol.

Vui Esu, we nit tuwale ira anan Christ alo tapeva sur God;
Iniko, o Natui, o Mama:

Ka toga alo inau.

Vui Tapeva wa o Ronova:

Ka vasurat inau ape tapeva we rono.

Vui Maran:

Ka ave inau ilo nuu nol.

Vui we Mana:

Ka mana goro Satan alo inau.

Ka ge Jesus Ni esu mulan alo inau, na toga tanun anana taurmate ape Non o Maros, o rowrowovag o tangemarmaros munia.

Lord, Ka ge si na tape naatara sul nan mun o tapeva tama Ko we tape neira nia.

Lord, Ka ge si na magarosa ineira mun o magarosa te ge inau a sike ran a vaesura.

Ka tin alo inau o tapeva, tama o av we lawalawa, o tapeva tete pea lai gai matea.

Ka sogov munau o mana alo tataro, Ka ge si na lai alo tataro tiatias apen ragai qale asasau naniko.

Ka ge si alo nok o tataro alo Sasan i Vavakae, Jesus, nan te lalakete lai goro Satan amairasei we sea, wa si, a ge ris natoqara suriko.

Hymn 99.

Mapsag ilo lolomam, Vui,
Valawar mun av me sage,
Vui ge urai Iniko.
Val sogov nol we ukeg ma.

Nom o urai ma vunana,
Varagai, esu, tapeva.
Ka ge marmaran galava
Namatamam me marav ti.

Nanagomam we manitnit
Ge maea mun o sogov poa :
Gol savrag ra tavalalea ;
Ko qe ave a tamata.

Vatogo kamam si Mama,
Natui, Kamtol-Tuwale ;
Si alo qon te toga ti
Kamam a sur tamaike ran :

Vawia matev lolowia,
Mama, Natui, Vui Rono. Amen.

O WOAI NAN TALO VUI.

1. O Woai talo Vui—"o Tapeva."—*Gal. 5. 22.*

1 S. John 4. 16.—God o Tapeva ; wa isei we goara alo tapeva, ni we goara alo God, wa God alo ineia. . . . Inina we tape, o manigiu Ni me tape moai nina. . . . Isei qe tape God, ni tape mulan tasina.

1 Cor. 13. 4.—O Tapeva ti rono malapusa, ti lolowia ; o Tapeva gate loloanu, gate vinvin, gate pugete, gate lilil, gate sikesike sogosoqo napulana ; gate lologagara gaplot, gate vasvasogo pugai nan ; gate masekeseke ape linai we malkeke, nava we masekeseke saratuwale alo linai we nan ; ti ronovirig alo savasava nan, ti nomtup ape savasava nan, ti maros nereii o savasava nan, ti rono malumuaga o savasava nan. O Tapeva tete mas tagea lai tea.

Lord, Ka waka namatak, Ka ge inau na nom qalo si na me ge ava o sava talo line Tapeva.

God, Vui we Rono, Ka lav magariosa nok o tataro wa Ka pirin inau, o wo-Tapeva ni poapoa alo lolok.

God, Ka tin alo inau o maros we poa, tete pea lai, si na tama Iniko alo Tapeva. Isei we taurmate alo tapeva, me mate veta munia kel, pa nau we gogolo, we mageregere : Ka pirin inau. Ka pirin inau, na ilo qalo i Jesus, Natuma we lulum wa we tano ran alo val gene, wa Ka vapoia nok o Tapeva suriko nia. Ka varagai naapek we siwosiwo, Ka na titin nalolok si na onavag o Tapeva namoma.

God o Mama o Tapeva, God o Natui me mate avune Wolo-wolo o manigiu o Tapeva, God o Vui we Rono o tur ga-Tapeva, o qeteg tapeva alo lolok : nau we momogo Iniko, nau we logwia Iniko, nau we la muniko nok o nomleas, nok o ge-ilo, nok o maros nol.

Mulan, nau we ukeg muniko iragai we toga nit tuwale alo tapeva amenau, ra sogok nol, ra pulsalak nol, iragai nane we mawmawui saratuwale amenau. Ragai we gopa, iragai we lolowono, mamagarosa, Ka ilo lolowia neira. Ka kokor goro kamam nol, si iake, si arasu, si alo esu, si alo matea, alo Pultuwale we Rono o line Tapeva Namoma ; mun Jesus Christ i Lord inau.

God, ape Nom o Tapeva we poa, nau we tape Iniko mun nalolok nol, wa o manigiu Iniko nau we tape ratagvanuak mulan.

2. O Woai talo Vui—"o Lolomasekeseke."

—*Gal. 5. 22.*

O lolomasekeseke, was ma alo we pultuwale amen Jesus. Iloke o woai tape Linan Christ, ape tagai o lolomasekeseke amaira sul loloqon. O tanun tete tin lai o woai iloke, o tanun tete riv lai o sivui tapena, o gariu tapena we toga alo God ran, wa o woai alo matev tanun.

O lolomasekeseke, o malakalaka, we seasea apena :—

Ape gene nan talo marama, ape Vaesuva, *Ps. 126. 1, 2* ;

ape linai we taniuiga, *Ps. 67. 4* ;

ape line tataro, *Ps. 122. 1* ;

pa o TUR masekeseke, ALO I LORD, *Ps. 104. 34 ; Phil. 4. 4 ; S. John 16. 22.*

O pultuwale amen Jesus, o lolomasekeseke. "Nau te ilo kami . . . natoqamiu te malakalaka."

Lord, nau we malakalaka ape Nom o sogov alena ma alo marama iloke, ape o loa we sinasina ma, ape o qon nau we mapsag maturu alolona, ape tau riv, wa ape tau gorogoro, ape

sinaga o tano we ukeg ma. Nau we malakalaka apenra sogok, tara pulsalak *nan* we wia, wa raka sage nau we malakalaka ape Nom o Vaesuva liwoa.

Lord God, nau we lolowono ape nau we toga masur vag o nonomia ape gene we seasea iloke. Ka magarosa pirin inau, Ka ge mule naatak si na gilala o tur masekeseke alo Iniko moma iake. Ka ge navalak a uravag o maraeva wa nagaramiak mun o line as apena. Ka ge si na goara pulpul amen Jesus, o woai iloke ni poapoa amenau; munia gina Jesus Christ Natuma i Vaesuk.

3. O Woai talo Vui—"o Tamata."—*Gal. 5. 22.*

O Tamata ma alo toge-tanun alo ni we van pulpul amen God. Isei we gilala si o Mama amaia ni we goara alo tamata, tama Christ (*S. John 16. 32*). O Tamata ma alo nina o tanun we gilala si me nomvitag veta o pugai. Nina o tanun tete toga masur o manigiu isei we sea, wa mun o sov avune gene *nan*, nava alo Tapeva mon God we togotoga alolona, wa ni we toga masur, we toga rorono nia. Jesus wa,

"Si isei ge ima o pei iloke te marou mulan; pa isei ge ima o pei na te le at munia, ni tete marou lai mulan ti tuai ti tuai; nava o pei na te la at munia te qaran pei alo lolona ti vuravura ilo esu galava."—*S. John 4. 13, 14.*

Lord, Ka ukeg si o Tamata we toga galava a goara amenau, na toga masur alo vatitne gene *nan* talo marama iloke we lakosa.

Lord God, Tag Tamata tavunana, o moe sogov o Mama we alena ma, nau we sikesike Iniko: Ka toga amenau na toga Tamata apena.

Lord, Vui Tamata, Ka goara alo inau; alo nok o lolowono, Lord, alo nau ta vagona, Ka ge masur natoqak, si o Tamata namoma a poapoa alo inau; mun Jesus Christ i Lord inau. Amen.

Lord, Ka varagai inau alo qon nol tape togara iake alo marama we lakosa, alo o malumalu nan we qeteg toletole, alo o malurav we nina ma, wa o mawmawui talo marama we siwosiwo we toga rorono, wa nanok o gagapalag me qet. Paso nan, Lord, alo Nom o magarosa, Ka ukeg munau o tano toga-toga wasawasa, o mapsagiva we rono, wa Nom o tamata alo ulusui; mun Jesus Christ i Lord inau. Amen.

Mama Magarosa, God i Ge masur, Mama avunana :

Inau natuma we sov naapek avunama.

Mama Tur Maran, amaiko o nomris tagai, Ko gate sea tea, Nom o Tapeva we toga netenete ran :

Nau we matueg ivunama.

4. O Woai talo Vui—"o ronomalapusa."

—Gal. 5. 22.

Nau we nomkel Iniko Lord :—

Judas me nimnimiko alo we maniriniko—

Nom o vavae we malumlum.

Ra Sala me toavtagiko—Ko gate golgol apena.

Ra soldier me taur vavakae Iniko—Ko gate leasag goro.

Ituwale me woso Iniko—Nom o vavae we lolowia.

Me tila galegale Iniko—Ko me toga rorono.

Me gege Iniko alo we vevegiko—Ko gate wutoto goro.

S. Peter me tala Iniko—Ko me iloiloa gegese.

Avune Wolowolo—Mama, Ka nomvitag ineira.

Lord God, o tano lolowono we qogo amen kamam alo marama iloke, wa nomam o togara we gona : Ka sogov ma munau o rono malapusa na tataga Natuma alo Non o togara alo vatit-nara tanun nan ; alo me linasapurua Ni gate linasapur kel, alo me ronovivtig Ni gate la vavakae goro ; munia gina i Jesus Christ i Lord inau. Amen.

Jesus, Ronomalapusa, Ko we gilala natoqak, ape o toqai *nan* we tawala goro Nanagoma, wa Ko we gilala o nonomia nol :

Ka wurvag *nan* nau o sotaliva, wa o nom rekereke nol.

Ka ge natoqak we maremare ni malumlum vag o tapeva Namoma :—

Ge taro kel natoqak alo ta lakosa vag o lologona.

Ge pea o nonomia we leralera, o line qaqae tape lologagara.

Jesus, Ronomaul, Ka ge inau na ronomaul.

5. O Woai talo Vui—"o Lolowia."—*Gal. 5. 22.*

"Qeteg tama o natmera *nan* " (*S. Matthew 18. 3*).

"Inau alo vatitnamiu tama i laplapasag " (*S. Luke 22. 27*).

"Nau me map mun kamiu o makaliu, si kamiu mulan a ge tama Nau me ge ti " (*S. John 13. 15*).

Jesus me poapoa mun o lolowia amen God wa amaira tanun *nan*. O gagapalag mon Jesus we gaganag lue non o Lolowia vagae. Jesus gate nonom si isei te vava si, We wia tamaine, nava Jesus me map o makaliu, wa namoniua a ge tataga ran. Nonina o lolowia, si apena, te *nan*alue alo gagapalag we wia sur God wa sur o tanun *nan*.

Lord God, Ka pirin inau. Nau we tape Iniko. Ka sogov ma o Vui we Rono si o lolowia a poapoa alo lolok, na lolowia valvalsei, na valakas nalinama tamaine. O lologona ni pea, o matawolowolo ni pea, nalolok ni wia gese, o tangemarmaros muniko wa o tanun *nan* ; mun Jesus Christ i Lord inau. Amen.

God Mama, alo Sasan Jesus, Tasik o Moemera, nau we tataro si Ka pirin nau a toga tama we taran natuma, si na rowrowo-vag sur ra tasik *nan* alo marama, si na nonom apenra mageregere, si na lolomagarosa ira we lera, si na vava pirin ira we apemot. Ka mapvitag *nan* nau val gene we ge mot o pul-tuwale : o nonomia ape nau kel, o galegale, o sotaliva, o nomvasigtag iragai we sea, o lologona nol, Ka ge si na toga pulpul amaira sul nol mun o lolowia gese ; o manigiui Natuma meratape Jesus Christ. Amen.

Mama, tama o natui me van reag nan tamana nau me ge vanameag Nom o sogov alena munau. Tama o moemera me mero nau me lologona Iniko wa ratasik. Tama ira maw-mawuitag we tatas, na me gogoroi naniko o woai tape tupei. Nau gate sov mantag ivunama, nau me nomvaruarua ape Nom o tapeva, nau me leasag, me meromero ape Nom o line vatanau, nau me ge vasigtag Nasasama tamaine. Inau, o line varean tagai amenau.

Panava, Ko we varnina inau mun o tapeva gate sea tea. Ko me vasager taurmate nagak, o Sinaga Vui alo Imama, Mama. Mama, Ka ge ris natoqak, mun o ulsavrag napugak; Ka vapoa amenau o lolowia suriko, wa tamaine munra tanun not.

6. O Woai talo Vui—"o Alena."—*Gal. 5. 22.*

God me vatran valsei ilo marama iloke, natanona apena, non o gagapalag we taurmate munia. Me sogov mun valsei o sava-sava, si o lailai ape gene we tira munia a ge. We tira mun o tanun a lav val gene mun o nonomia iloke, wa sin toga taurmate ape ukeg vano tama God we maros.

Jesus, Natun God :

Me map reag o lenas tavunana o manigiu Non o gagapalag alo marama ape nau.

Alo marama, me aseg naqonina tataga o Maros mon God apena (*S. John 2. 4 : 13. 1*) ;

me ukeg Non o nonomia mun God si God Ni gagapalag nia (*S. John 5. 30*) ;

me ukeg Navalana Ni vava o vavae mon God gese (*S. John 14. 24*) ;

me gagapalag gese o Maros mon God (*S. John 5. 36*) ;

me ukeg qet ran Ineia kel, o sogov mun o tanun.

Jesus we vatran inau tamaine :—" O tamata mun kami ; tama o Mama we vatran Nau ma, tamaine gina Nau we vatran kami at."—*S. John 20. 21.*

Lord, Ko we sogov munra taniniga tara ra gate taniniga, Ka pirin inau, na taurmate ape pirin iragai we sea tataga Nom o maros turwia.

God, nau we wiewavae Iniko o manigiun Ko me sogov munau o turiai we wia wa o esuva, Ko me ukeg inau alo vatitne sul we wia, tamak, ravevek, tasik, tutuak, ra pulsalak nan ; Ko me na lolomaran inau alo line school, namatak we ilo qalo lai o gene nan we lulum, naqorok we ronotag lai o gene nan we fano, o line as, o line lakalaka, o book, o totogale, o sinasina tape loa, wa tape vula mulan.

Ko me ukeg Natuma ma si a togotoga alo matev tanun, Ni we gilala natarapek si we tama o sava, we magariosa nok o mageregere, we pirin inau alo masaoi we tira apena ; alo lolowono, we ge masur ; alo meregaleva, we varagai ; wa me la taurmate ape qon matea o maros-neri tete ava lai, ape esu galava amaiko :

Nau we wiewavae Nasasan Jesus we Rono.

Jesus, Vaesu, Iniko o sogo-tagai, neira me vasigtagiko, neira me viroag nanagora nan wa iloko :

Inau we momogo Ko.

We nun, Ko we la moma nonina o lolowono nan, me as raveagluwe Ko ape pugak :

Nau we mawo mun o towosiko.

Me map napugak ivunama, inau iloke we lera tama o sheep me sipa ape matesalak. Nau gate sar we log Nasasama, panna, nau we logwia Iniko, we wiewavae Iniko, we momogo Iniko, we log ronoga Iniko, we vareaniko, ape Nom o Tapeva we poa me sogov alena munau.

Jesus, Vaesuk, Ka vasoal ma Nom o Vui alo lolok, na lai we tama Iniko apena.

7. O Woai talo Vui—"o Nomtup."—*Gal. 5. 22.*

We nomtup was we sov ran avunansei, we tape ineia, we matueg ran avunana, we manas goro mantag ran ineia.

Christ o tur Makaliu apena, ape Ni we nomtup God :—

Alo tano reremera—*S. Luke 2. 49*—"namok ran."

Ni we maremare nia—*S. John 4. 34*—"Gak o sinaga."

Non o kere nonomia—*S. Jn. 5. 30*—"tete ge lai matapuk."

Me varagaia alo meregaleva—*S. Luke 22. 42*—

"nipea nok o maros."

Ni me qeteg Tur Ololo pe mana we vaesu nia—

Hebrew 10. 7—"God, Nom o maros."

Lord, Iniko o Nun, inau o qurequre. Lord, nau te mule surisei? Amaiko o vavae Esu, Ka valawar inau mun Nom o vavae vatogoa, Nom o Vui we Rono ni gagapalag alo lolok o Nomtup we maremare.

Mama, Ka pirin inau a sasarita Nom o Maros ape nau. Ka ge si na togatoga mun o tur sov ivunama, tama si o natui alo Iman o Mama.

Na tape Iniko, na matueg apesov avunama, na lolotitin ape manas goro Iniko mun o malakalaka. Ka ge pea nok o nomqerqeret alo tataro, si na nomtup mantag Nom o lolowia sur nau. Ka pirin inau na gaganag muniko ape val gene, nok o malakalaka wa nok o lolowono, we sike vagae o tur pulpul amaiko. Ka ge inau we tama natuma wa gate tama i gene we sikesike o rusag. O ronoga tape Nasasama ni moe gene mun nau. Ka ge inau na poapoa taso alo nomtup nau gai taurmate ran tama Iniko we taurmate ran ; mun Jesus Christ Natuma.

8. O Woai talo Vui—"o Matev Aperig."—

Gal. 5. 22.

Iloke gate kalokalo ma nan o toqe tanun matapuna, pa iloke o woai talo Vui me wota ma amen Christ alo lolonina. Gate o matev mageregere tama si tete sea lai, nava o vaglala ape vavakae, we vaglala isei we maranaga goro lai namatevuna wa non o nonomia nol. O matev aperig gate ge o tanun we vava ape neia kel si we tatas nan o nun, wa tete ge o tanun ni vava si ni gate sasarita ape gene ni we gilala veta sin we lai apena. O tanun te gilala si val sogov ma God (*1 Cor. 4. 7*), wa ni te gagapalag pepewu tataga, o wutoto tagai, o lologagara tagai, ni te ronomaui alo gene *nan* gate sea lai.

Lord, nau we nom rekereke, inau we sotal kel nau, Ka pirin magarosa inau, si na toga aperig, si na lalalano pepewu alo Nagoma; mun Jesus Christ i Vaesuk.

God, Ko me *tin* inau si na ge tataga Nom o Maros, si na tira netenete avea Ko we nom vasarig apena, si na gagapalag tama Ko we maros. Nok o maros we tamaine, wa o manigiu o ine nau we ukeg ran inau kel muniko, o turiai, o atai, o vui, si Ka gagapalag vunvun alo lolok o matev aperig iloke, na ge qalo lai Nom o nonomia ape nau; mun Jesus Christ i Lord inau.

9. O Woai talo Vui—"o Line Ora Goro."—

Gal. 5. 22.

Was we ukeg qet o nonomia wa o turiai mun i Lord gai qalo tama S. Paul me vava lai, wa "nau we esuesu, pa gate nau nake, nava i Christ we esu alo inau" (*Gal. 5. 20*).

Jesus me toavtag navanuana turwia avunana.

Jesus me toavtag Ravevena, navanuana, ra sogona alo marama.

Jesus me log ira anana ape togara we gona valqon gai mate.

Jesus me vet si ira anana a leasag kelura wa a la kalo
o Wolowolo.

Jesus, mona, me la kalo o Wolowolo ape matea o
manigiu inau.

God, Ka sike waririag ape lolok, Ka gilala wurvag inau, Ka
meregale inau, Ka gilala wurvag ape nok o nonomia *nan*. Ka
sike ape linak si o takelei we tatas wun apena. Ko we maros
o nun alo loloi, wa nalolok we uravag o galegale wa o sokoi
goro. Ka vasug inau, Ka wurvag wenewene inau. Ka tin
munau o toqai wenewene, God, Ka ge garaqa alo inau o atai
netenete. Nipea vasigtag naatak we manoanoa, we magere-
gere, we gogolo.

Nan wa gale inau kel—Lord vaesu inau.

Nan o sokoi goro nol—Lord vaesu inau.

Nan o nonom ape nau kel—Lord vaesu inau.

Nan we sikesike o line varean amaira tanun *nan*—

Lord vaesu inau.

Nan namatevuk we tatas, we mageregere—

Lord vaesu inau.

Nan we gogolo o ronovivtig o manigiu Iniko—

Lord vaesu inau.

Jesus, me gale ilo Iniko—ape ge mapsag Naturiama we Rono,
ape iloraka o matesala we toga wora,
ape matueg avune tanun leas o Mama,
alo paspasoanai si a vaesu keluko
nan o Wolowolo.

Jesus, me galegale Iniko, tama we galegale inau ; we, wa we
sal nan nau—

Ko we gilala we pirin, Ka pirin nau.

Jesus, Ooloo we Liwoa, i Vaesu, i Magarosa, nau we ukeg at
inau kel suriko, ape esu, ape matea, ti tuai, ti tuai.

Christ, Ka lav inau.

Mama, Ka lav vasgot inau.

“ANIMA CHRISTI.”

1. Naesun Christ, varono inau.

Naesun Christ, we manas goro nan we tuai ma o Maros mon Tamama avunana, Ka vapoalo alo esuk o line manmanas.

Naesun Christ, we toron galava we vaesura tanun nan, Kalin alo esuk mulan o tinegaro apena.

Naesun Christ, we lolowono alo tuqe olive, Ka ge ura naesuk mun o lolowono we rono, tete pea lai, was :—

O lolowono ape pugak me paso,

O lolowono ape nan gate sar ilokenake,

O lolowono ape pugarasei we sea,

O lolowono ape Nom o Ronovivtig,

O lolowono ape we magarosa iragai we sea nan nau,
neira we toga mamagarosa, si we ronovivtig.

2. Naturian Christ, vaesu inau.

Naturian Christ, me wota mantagai ma si a rave o tanun nol suriko—Ka rave inau suriko.

Lord, mun Naturiama, me malewa mun Nom o gargara mamas, mun Nom o mawmawui, mun Ko we mamamata qon wa maran—Ka vasoal ma munau o sogov, o tapeva nane, wa o tinegaro, si na vaesu lai we qogo nan o matea.

Lord, mun Naturiama me vasug vag Nanarama alo tuqe Gethsemane—Ka vasoal ma munau o tinegaro alo tataro.

Lord, mun Naturiama me rave ti raveaglue o matesale vanua a Jerusalem—Ka sogov munau o ronomalumuaga.

Lord, mun Naturiama, me towosia ti mun o ga-towos—Ka vasoal munau o *line* matartoga.

Lord, mun Naturiama, me vatakana mamasa avune Wolo-wolo—Ka sogov munau o nom mataketake lai o gene *nan* talo marama, wa si na ora goro mantag naturiak.

Lord, mun Naturiama, me saloa alo qarana—Ka ge si inau a nomkel vagae apena, wa si na sogon pata alo toqak o nonomia ape Nom o Ronovivtig.

Lord, mun Naturiama, gate ilo o lepava tape qarana matea—Ka vaesu inau nan o ganganor naatak we lepa lai apena.

3. Nanaran Christ, ge mule inau.

Nanaran Christ, Lasa we wia, Ka ge titin nalolok mun o tapeva we poa sur i Tin inau, i Tamak, i Vaesuk, i Tapetape naatak.

Nanaran Christ, Lasa we wia, Ka ge pea alo inau o nonomia tape gene *nan* talo marama.

Nanaran Christ, o *Wine* we mana, Ka wurvag qet inau, o turiai wa o atai, si na toga wenewene ran.

Lord Jesus, Ka ge si Nanarama, o gene tun, ilone Ko me nekeg we sale ti ape nan, Ni na titin naatak mun o maros we nun wa we maremare, si na ronovivtig lai o manigiu Iniko, wa Ni varagai taso inau apena.

Lord, na we paere o sogov *nan* iloke amaiko;

Mun Nanarama Ko me lin alo me tevevaglala Iniko,

Mun Nanarama tape Nom o Ronovivtig a Gethsemane,

Mun Nanarama me sale alo neira me wosowoso Iniko,

Mun Nanarama me sale alo me towtowosiko,

Mun Nanarama me sale alo neira me vilqatiko,

Mun Nanarama me salesale alo matesala a Jerusalem,

Mun Nanarama me tirtir nan Napanema we Rono,

Mun Nanarama me vasug Naranoma nia,

Mun Nanarama me vinrag nan Nalalama alo me as Iniko,

Ka ronotag inau.

4. **Pei nan Nalalan Christ, vasug inau.**

Lord Jesus Christ, Ka ukeg si o pei me sale nan Nakikima we mataqa a vasug reag napugak nol.

Ni wurvag nan nau napugak we toga pata.

Ni wurvag nan nau napugak tape nok o nonomia.

Ni wurvag nan nau napugak alo nau me ge isei we sea we ava.

Ni wurvag nan nau napugak ape gene nan nau me valu-ava apena.

Ni wurvag nan nau napugak ape na me sotsotal, ape nau me nonom aneane ape nok o maros kel, ape nau we nonom sal ape gene nan tape marama.

5. **Ronovivtig non Christ, varagai inau.**

Lord Jesus Christ, sa si Nom o Ronovivtig a varagai inau na tira lai alo ra tavalalea goro naatak we rowo ma sur nau. Sa si o nomnomkel Nom o Ronovivtig we kikina a ge inau we lolowono apena ; a varagai inau goro o nonomia tape gene vaketeag nan talo marama iloke. Sa si o nonomia tape Nom o Ronovivtig a varagai inau goro inau kel, wa o nonomia apeniko me ge pepewu aneane Iniko kel a varagai inau goro namatevuk we sotsotal : wa o nonomia ape Nom o rarakut we lava, a varagai inau goro nok o tortoron kiskislag nan.

Lord Jesus, alo Ko me ronovivtig Ko me toga aperig wa ra Angel nan me varagai Iniko : Ka ge si o nonomia tape Nom o Ronovivtig te varagai inau alo qon esuk nol, wa si o nonomia ilone te varagai iragai nol we toga lolowono si we toga alo meregaleva.

6. **E! Jesus Turwia, Ka ronotag inau.**

Lord Jesus, Ka ronotag inau ape nau we mageregere aneane.

Lord Jesus, Ka ronotag inan, o manigiu Nasasama.

Lord Jesus, Ka ronotag inau, o manigiu Nom o ronoga alo we magarosa.

Lord Jesus, Ka ronotag inau, wa Ka ge si o tanun nol a nina suar Nom o Tapeva we rono, wa te poapoa alolona.

Lord Jesus, nan we tiasiko si Ka ronotag inau—

mun Nom o tataro alo Ganagana Ravrav apenragai we tataga Iniko :

mun Nom o tataro apenra ganganor nol :

mun Nom o tataro alo Wolowolo apenragai we gege Iniko.

7. Alo Nom o mate-mataqa vatnorag nau.

Lord Jesus, Ka lav inau we mamagarosa si na toga wasa-wasa alo Nom o mate-mataqa, we sar nane si a momogora.

Mun Nom o mataqa, Ka vaesu inau nan wa apemot. Satan we ge ilo vagoqo si a vara siwo naatak, naatak nane Ko me tunkel mun Nanarama turwia. Ka vaesu inau. Ka vatnorag inau nan rasei we lologona inau si we tavalalea goro inau. Ka map pata inau nan o vavae varean mor o tanun nan, wa nan ragai we sonus inau. Ka vatnorag inau nan o gene nol we vilewora lai inau naniko.

8. Nipea ukeg inau si na vilewora naniko.

Nipea ukeg o ganganor a vilewora lai inau naniko.

Nipea ukeg o lolomaran a vilewora lai inau naniko.

Nipea ukeg o nom mot tea a vilewora lai inau naniko.

Nipea ukeg inau a vilewora naniko alo nonomia.

Nipea ukeg inau a vilewora naniko alo gene nan we vagisgis amenau.

Inau nipea vilewora naniko alo we malakalaka, alo sotaliva, alo ganagana vasusmag, alo we tape iragai we seasea, si alo gene nan gate wia mantag amenau, alo lolowono, alo we apemot, si alo pugak valvalqon. Na goara amaiko, Lord, ti tuai ti tuai.

9. Nan Satan o tavalalea turgoro inau.

Lord Jesus, Ka turgoro inau, Ka pirin inau, ape nau we mageregere wa gate tira goro lai ra tavalalea si Ko gate pirin inau. Ka vaesu inau, Ka tigoro inau :—

nan o gene tiatiag non Satan.

nan o gene nan we tano tape marama.

nan o line sonson nora tanun nan.

nan o tortoron kiskislag talo turiai.

Alo masagon mateak Ka log inau ; Ka vava wa, Van ma sur Nau. Ka ge si amaira Rono anama, Na logwia lai Iuiko, ti tuai, ti tuai. Amen.

O NONOMIA APEN**I LORD ININA ALO MATEV TANUN.****Bethlehem.**

Ape Ko me wota tanun ma amen Ravevema Mary ro Qilowar vawia, amon o Vui we Rono—Jesus, na we vareaniko.

Ape Ko me siwo ma we taur pul amen kamam alo nomam o mageregere nan—Jesus, na we vareaniko.

Ape Ko me waka o marana tavunana mun kamam, wa me manasag lue ape gagapalag nora Angel nan—Jesus, na we vareaniko.

Nazareth.

Mun Nom o tano-reremera we rono a Nazareth—
Jesus, Ka pirin ra reremera nan.

Mun Nom o line vatanau alo school a Nazareth—
Jesus, Ka pirin ra reremera nan.

Mun Nom o line momogo alo ima-siwo-tuwale aia—

Jesus, Ka pirin ra reremera nan.

Mun Nom o mawmawui wa Nom o oraora nol—

Jesus, Ka pirin ra reremera nan.

Mun Nom o line manas goro—

Jesus, Ka pirin ra reremera nan.

O tano-lumagav.

Mun Nom o poava alo turiai wa o lolomaran—

Jesus, Ka pirin ra lumagav nan.

Mun Nom o lalakete goro val meregaleva nan—

Jesus, Ka pirin ra lumagav nan.

Mun Nom o line ora goro kel—

Jesus, Ka pirin ra lumagav nan.

Mun Nom o tatara wa o varean valvalqon mun God Tamama—

Jesus, Ka pirin ra lumagav nan.

Mun Nom o gagapalag we pepewu alo gene nan we tira—

Jesus, Ka pirin ra lumagav nan.

Mun Nom o tapeva wa o lolowia—

Jesus, Ka pirin ra lumagav nan.

Galilee.

Mun Nom o ronronotag o lolowono wa o vivtig tape esu iloke—

Ka sogov mun kamam si a ronovirig lai.

Mun Nom o togara we masara—

Ka sogov mun kamam si a ronovirig lai.

Mun Nom o lolowono ape gene nan me peapea—

Ka sogov mun kamam si a ronovirig lai.

Mun Nom o tapeva alo we ronomaul apen ragai we sea—

Ka sogov mun kamam si a ronovirig lai.

O tano lopsag.

Mun Nom o varavara we nala alo matesala wa o wanare matesala tape vanuama—

Jesus, Ka pirin inau na rig nok o wolowolo.

Mun Nom o tantan areare wa o surmata alo tauwe Olivet—

Jesus, Ka pirin inau na rig nok o wolowolo.

Mun Nom o vanoga *nan* we sikesike a vaesu o sul—
Jesus, Ka *pirin* inau na rig nok o wolowolo.

Mun Nom o malakalaka alo Nom o Ronovivtig wa Namateama—
Jesus, Ka *pirin* inau na rig nok o wolowolo.

Calvary.

Mun Nom o pulpul alo nor o lolowono alo qaranin Lazarus—
Ka *pirin* inau na ta esu na ta mate.

Mun o vasasa we vagis ilone Ko me mule at ilo matea—
Ka *pirin* inau na ta esu na ta mate.

Mun Nom o mapsagiva we maros nere i alo matea—
Ka *pirin* inau na ta esu na ta mate.

Mun Nom o ge vuvun o Maros mon o Mama—
Ka *pirin* inau na ta esu na ta mate.

Avunana.

Ape we waka tawela o tano tamate—
Jesus, kamam we vareaniko.

Ape Nom o tavaraka kel alo Turiamia—
Jesus, kamam we vareaniko.

Ape Ko me vantak Naturiama ivunana alo we Mule Kalo—
Jesus, kamam we vareaniko.

Ape Nom o sogov mun kamam we vatavata si kamam a toga
galava amaiko alo turiai wa alo atai—
Jesus, kamam we vareaniko.

Lord Jesus Christ, Ko me nkeg mun kamam a pulpul
amaiko alo matev lenasima ape Ko me taur muniko nomam o
matev tanun. Ka vasaal ma mun kamam o mana tape
gene vagis we rono, Naturiama wa Nanarama, si kamam a
ronovirig alo qon esumam iloke si alo me paso kamam a ilo Ko
alo lenas tape Nom o Tavaraka kel, Ko we esu wa we riga
goro amen o Mama, wa o Vui we Rono, God Tuwale ran, o
marama o ulusui tagai. Amen.



